

佩文齋廣羣芳譜卷第一

天時譜

春

增禮記鄉飲酒義東方者春春之爲言蠢也產萬物者聖也注蠢動生之貌也聖之爲言生也疏東方產育萬物故爲春爲聖爾雅春爲青陽注氣青而溫陽春爲發生公羊傳春者何歲之始也注春者天地開闢之端養生之首管子東方曰歲星其時曰春其氣曰風風生木梁元帝纂要春日陽春青春芳春三春九春風曰陽風春風暄風柔風惠風景曰媚景時曰良時嘉時芳時辰曰良辰嘉辰芳辰節曰華節芳節嘉節良

節韶節淑節草曰弱草芳草芳卉木曰華木華樹芳樹
陽樹林曰茂林芳林

彙考

原詩小雅

春日遲遲卉木萋萋倉庚喈喈采繁祁

祁

增

詩正義

周成王太平之時于春時親耕籍田以

勸農桑又祈求社稷使年豐

周禮天官內宰上春詔

王后帥六宮之人而生種稷之種而獻之于王

注先種

後熟曰稷後種先熟曰稷

史記叔孫通傳孝惠帝曾

春出遊離宮叔孫生日古者有春嘗果方今櫻桃熟可

獻願陛下出因取櫻桃獻宗廟上許之諸果獻由此興

原

前漢書文帝紀

元年三月詔曰方春和時草木羣

生之物皆有以自樂

增

律曆志

少陽者東方東動也

陽氣動物于時爲春春蠢也物蠢生迺動運後漢書

明帝紀永平三年春詔曰夫春者歲之始也始得其正

則三時有成有司其勉順時氣勸督農桑章帝紀元

和二年詔曰方春生養萬物莩甲宜助萌陽以育時物

郎覬傳方春東作布德之元陽氣開發養導萬物

逸周書禹禁春三月山林不登斧以成草木之長管

子日至六十日而陽凍釋七日而陰凍釋陰凍釋而菑

稷故春事二十五日之內耳莊子春雨日時草木怒

生銚鑄于是乎始修草木之到植者過半而不知其然

尸子春爲忠也東方而春春動也是故鳥獸孕榮華

生萬物遂忠之至也呂氏春秋冬至後五旬七日葛

蒲生乃耕菑者百草之先生者也于是始耕

淮南子

春風至則甘雨降生育萬物草木榮華莫見其爲者而

功既成矣

春秋繁露木者春生之性農之本也

原

劉向別錄鄒衍居燕燕有谷地美而春不生黍稷行吹

律暖氣乃至草木乃生至今名黍谷

增焦氏易林百

草嘉卉萌芽將出昆蟲扶戶陽明所得

谷風布氣萬

物出生萌芽長養華葉茂盛

春秋元命苞春者神明

推移精華結紐

注神明猶陰陽也相推使物精華結成

紐結要也

春秋文耀鉤春致其時華實乃榮

洛陽

伽藍記法雲寺北有臨淮王或宅或性愛山林又重賓

客至于春風扇揚花樹如錦晨食南館夜遊後園僚寮

成羣俊民滿席絲桐發響羽觴流行詩賦并陳清言乍
起莫不領其玄奧忘其褊恡焉是以入或室者謂登仙
也荊州秀才張裴裳常爲五言有句云異林花共色別
樹鳥同聲或以蛟龍錦賜之史畧北齊盧士深妻崔
氏有才學春日以桃花和雪與兒齏面云取紅花取白
雪與兒洗面作光悅取白雪取紅花與兒洗面作妍華
取雪白取花紅與兒洗面作華容國史補曲江大會
先牒教坊請奏上御紫雲樓垂簾觀焉時或擬作樂則
爲之移日故曹松詩云追遊若遇三清樂行從應妨一
日春勅下後人置皮袋例以圖障酒器錢絹入其中逢
花卽飲故張籍詩云無人不借花園宿到處皆攜酒器

行

原

曲江春宴錄長安貴家遊賞翦百花裝成獅子

互相送遺獅子有小連環欲送以蜀錦流蘇牽之曰春光且莫去留與醉人看 虞松方春謂握月擔風且留後日吞花臥酒不可過時 **玉麈集**穆宗宮中花開以重頂帳蒙蔽置惜春御史號曰括春 **開元天寶遺事**學士許慎選放曠不拘小節多與親友結宴于花圃中未嘗具帷幄設坐具使童僕輩聚落花鋪于坐下曰吾自有花裯何消坐具 楊國忠子弟每春至之時求名花異木植於檻中以板爲底以木爲輪使牽之自轉所至之處檻在目前而使卽歡賞目之爲移春檻 長安貴遊子弟每至春時遊宴供帳于園囿中隨 載以油

幕或遇陰雨以幕覆之盡驩而歸 長安俠少每至春時結朋聯黨各乘矮馬飾以錦幘金絡竝轡于花樹下往來使僕從執酒皿而隨之遇好園則駐馬而飲 長安士女春時鬪花戴插以奇花多者爲勝皆用千金市名花植于庭苑中以備春時之鬪也 長安士女遊春野步遇名花則設席藉草以紅裙遞相插挂以爲宴幄 寧王春時于後園中紉紅絲爲繩密綴金鈴繫于花梢之上每有烏鵲翔集則令園吏掣鈴索以驚之蓋惜花之故也 **增**六一詩話梅聖俞嘗與范希文席上賦河豚詩春洲生荻芽春岸飛楊花河豚當是時貴不數魚蝦河豚常出於春暮羣游水上食絮而肥南人多與

荻芽爲羹云最美 [溫公詩話] 先朝春月多召兩府兩
制三館於後苑賞花釣魚賦詩嘉祐末仁宗復修故事
羣臣和御製詩是日微陰寒韓魏公時爲首相詩卒章
云輕雲閣雨迎天仗寒色留春入壽杯二十年前曾侍
宴台司今日喜重陪 [東坡集] 吳越王妃每歲春必歸
臨安王遺書曰陌上花開可緩緩歸矣吳人用其語爲
歌 [歲時雜記] 一月二氣六候自小寒至穀雨四月八
氣二十四候每候五日以一花之風信應之小寒一候
梅花二候山茶三候水仙大寒一候瑞香二候蘭花三
候山礬立春一候迎春二候櫻桃三候望春雨水一候
菜花二候杏花三候李花鶯蜚一候桃花二候棠梨三

候薔薇春分一候海棠二候梨花三候木蘭清明一候
桐花二候麥花三候柳花穀雨一候牡丹二候酴醾三
候棟花棟花竟則立夏 曲洧舊聞范蜀公居許作長
嘯堂前有茶蘼架春時宴客花落酒杯中飲以大白舉
坐無遺謂之飛英會 東臯雜錄花信風梅花風最先
棟花風最後凡廿四番以爲寒絕後唐人詩云棟花開
後風光好梅子黃時雨意濃徐師川詩云一百五日寒
食雨二十四番花信風又古詩云早禾秧雨初晴後苦
棟花風吹日長 蓬窓續錄曲江宴唐進士會同年於
此豪客園戶爭以名花布道上進士乘馬盛服鮮製推
同年俊少者爲探花使白居易詩春風得意馬蹏疾一

日看徧長安花

道山清話

哲宗御講筵手折一柳枝

翫程頤爲講官奏曰方春萬物發生之時不可非時毀折哲宗亟擲于地

漁隱叢話

蔡繁卿守揚州春時作

萬花會用花十餘萬枝

原

遜齋閑覽河朔春時多大

風飛塵撼木數日一作二三日方止以訪左右對曰不

得是風且無年名曰吹花擘柳風草木百穀皆藉之

增乾淳歲時記禁中賞花非一先期後苑及修內司分

任排辦凡諸苑亭榭花木妝點一新錦簾綃幕飛梭繡

毬以至茵褥設放器玩盆窠珍禽異物各務奇麗起自

梅堂賞梅芳春堂賞杏花桃源觀桃粲錦堂金林檎照

妝亭海棠蘭亭修禊至于鍾美堂大花爲極盛堂前三

面皆以花石爲臺各植名品臺後分植玉蘭繡毬數百
株儼如鏤玉屏堂內左右各列三層雕花彩檻護以彩
色牡丹畫衣間列碾玉水晶金壺及大食玻璃官窰等
瓶各簪奇品如姚魏御衣黃照殿紅之類幾千朵至于
梁棟窓戶間亦以湘筒貯花鱗次簇插何翅萬朵自中
殿妃嬪以至內官賞賜有差下至伶官樂部應奉人等
亦霑恩賜謂之隨花賞至暮春則稽古會瀛堂賞瓊花
靜侶亭紫笑淨香亭采蘭挑筍則春事已在綠陰芳草
間矣 蔣苑使有小圃不滿二畝而花木匝亭榭奇
巧春時悉以所有書畫玩器羅列滿前開竿花藍之類
悉皆縷絲金玉爲之且立標竿射塚及鞦韆梭門鬪雞

蹴踘諸戲事以娛遊客衣冠士女至者招邀杯酒往往
禁煙乃已謂之放春

湖山勝槩豐樂樓舊爲衆樂亭

又改聳翠樓政和中改今名淳祐間趙京尹重建宏麗
爲湖山冠又蟄月池立秋千梭門植花木構數亭春時
遊人繁盛 清閒供春時晨起點梅花湯課奚奴灑掃
護階苔取薔薇露浣手薰玉蕤香讀古赤文綠字書聊
午採筍蕨供胡麻汲泉試新茗午後乘欵段馬執翦水
鞭攜斗酒雙柑往聽黃鸝日晡坐柳風前裂五色牋集
錦囊佳句薄暮遶徑灌花 花史漢武帝嘗以吸花絲
所織錦賜麗娟命作舞衣春 舊宴于花下舞時故以袖
拂落花滿身都著舞態愈媚 謂之百花舞 宗測春遊

山谷間見奇花異草則繫於帶上歸而圖其形狀名聚芳圖百花帶人多效之 武陵儒生苗形事園池以接賓客有野春亭雜植山花五色錯列 平湖上有龍湫山花爛熳不可枚舉近寺茅簷草舍皆繞植桃李春遊士女輻湊杯盤狼籍無不手撚花枝醉呼潦倒者 西湖志杭州壽安坊俗稱官巷宋時謂之花市亦曰花園蓋汴京壽安山下多花園春時賞宴爭華競侈錦簇繡圍移都後以花市比之故稱壽安坊今兩岸多賣花之家亦其遺俗也

集藻賦

御製春雨賦

神籥細縑化機和煦元氣上融醲膏下聚首五

行者曰水潤萬物者惟雨于時蒼祇泣節青鳥司晨餘寒未歛禁火方新風輕颺以習習雲密布而鱗鱗垂九霄之嘉澍飛四野之甘津始觸石以吐液旋彌空而散澤初曳縷以吹絲繼緣霄而滴墀乍密還疎欲斷又續拂宇披檐挹川注谷旣磅礴而淋漓亦瀟漫而滲漉憂綺埒之明瓊流銅池之文穀木欣欣以向榮草萋萋而如沐若夫徂畛徂隰是蓑是襦蒹麥漸秀田禾始苗廣地道之發育資土脈之沃饒雖霑體而塗足幸渥葉而濡條况乃灌溉神州濺汪赤縣無遠弗届靡幽不徧灑郊牧而歡呼浹寰瀛而舞朴慶玉燭之長調喜豐年之屢見夫惟天地之德廣大無私春生夏長雲行雨施寓栽培于無意普美利于不知

植品物以咸若含細大而莫遺所以解澤徬徨淇恩深厚
覆被民生惠鮮隴畝興有滄于三陽敷仙霖於千耦世並
享夫豐亨俗咸登於仁壽洋洋乎造物之弘功予一人乎
何有

增晉夏侯湛春可樂賦春可樂兮樂東作之良時嘉新
田之啓萊悅中疇之發苗桑冉冉以奮條麥遂遂以揚
秀澤苗翳渚原卉耀阜春可樂兮樂崇陸之可娛登夷
岡以迴眺超矯駕乎山隅綴雜花以爲蓋集繁蕤以飾
裳散風衣之馥氣納戢懷之潛芳鶯交交以弄音翠翺
翺以輕翔招君子以偕樂攜淑人以微行 周庾信春
賦宜春苑中春已歸披香殿裏作春衣新年鳥聲千種

唐書卷一百一十五
天賜元年
一
囀二月楊花滿路飛河陽一縣併是花金谷從來滿園
樹一叢香草足礙人數尺游絲卽橫路開上林而競入
擁河橋而爭度出麗華之金屋下飛燕之蘭宮釵朶多
而訝重髻鬟高而畏風看將柳而爭綠面共桃而競紅
影來池裏花落衫中苔始綠而藏魚麥纒青而覆雉吹
簫弄玉之臺鳴佩凌波之水移戚里而家富入新豐而
酒美石榴聊泛蒲桃醴醅芙蓉玉盞蓮子金杯新芽竹
筍細核楊梅綠珠棒琴至文君送酒來玉管初調鳴絃
暫撫陽春綠水之曲對鳳迴鸞之舞更炙笙簧還移箏
柱月入歌扇花承節鼓協律都尉射雉中郎停車小苑
連騎長楊金鞍始被栝弓新張拂塵看馬埒分朋入射

堂馬是天池之龍種帶乃荆山之玉梁
麗錦安天鹿新綾織鳳皇三日曲水向
河津日晚河邊多解神樹下流杯客沙
頭度水人鏤薄窄衫袖穿珠帽領巾百
丈山頭日欲斜三晡未醉莫還家池中
水影懸勝鏡屋裏衣香不如花

文賦散句

增

晉傅玄陽春賦乾坤絪縕冲氣穆清幽蟄

蠢動萬物樂生依依楊柳翩翩浮萍桃之天天灼灼其
榮繁華曄而耀野燁芬葩而揚英湛方生懷春賦麥
芄芄而含秀桑藹藹而敷榮華照灼以爛林葉婀娜以
媚莖王廙春可樂賦春可樂兮樂孟月之初陽冰泮
渙以微流土冒橛而解剛野暄卉以揮綠山蔥蒨以發

蒼 [李頤四時賦] 平臯眇莽中林蔥青野馬飛澗晨虹

垂旌陽燕南徂陰鴈北征素華皓皓丹秀熒熒 [謝萬

春遊賦] 青陽司候勾芒御辰陳條灌以摧枯初莖蔚其

曜新囂豐葉而爲幄靡翠草而成茵 [宋劉義恭感春

賦] 天晡曖而流寒日陰翳而淪精風淑穆而吹蘭雨濛

濛而洗莖草承澤而擢秀花順氣而飛馨 [梁元帝春

賦] 洛陽小苑之西長安大道之東苔染池而盡綠桃含

山而併紅露霑枝而重葉網縈花而曳風 [隋蕭愨春

賦] 落花無限數飛鳥排花度禁苑玉饒風吹花春滿路

[唐王勃春思賦] 蜀川風候隔秦川今年節物異常年

霜前柳葉銜霜翠雪裏梅花犯雪妍霜前雪裏知春早

看柳看梅覺春好思萬里之佳期憶三秦之遠道滯蕩
春色悠揚懷抱野何樹而無花水何隄而無草 **原**宋
之問春宴韋曲莊序萬株果樹色雜雲霞千畝竹林氣
含煙霧激樊川而縈碧瀨浸以成波望太乙而鄰少微
森然逼座 鋪落花以爲藉結垂楊而代幄霽景今日
晚霞五彩而丹青韶光卷雲春臯一色而凝黛 **李邕**
春賦楊迴曲沼李雜芳園條煙濃而曳地花錦繡而當
軒 **李白**春夜宴桃李園序幽賞未已高談轉清開瓊
筵以坐花飛羽觴而醉月 **惜餘春賦**平原萋兮綺色
愛芳草兮如翦惜餘春之將闌每爲恨而不淺

五言古詩

御製春旭口含新淑春光覆滿屋東皇轉歲華融氣雜山谷

增晉郭璞春青陽暢和氣谷風穆以溫英蔭畦林蒼昆

蟲咸啓門高臺臨迅流四座列王孫羽蓋停雲陰翠鬱

映玉樽齊謝朓新渚宛洛佳遨遊春色滿皇州結軫

青郊路迴瞰蒼江流日華川上動風光草際浮桃李成

蹊徑桑榆蔭道周東都已俶載言歸望綠疇梁簡文

帝春日年還樂應滿春歸思復生桃含可憐紫柳發斷

腸青落花隨燕入遊絲帶蝶驚邯鄲歌管地見許欲留

情晚日後堂幔陰通碧砌日影度城隅岸柳垂長葉

窓桃落細跗花留蛺蝶粉竹翳蜻蜓珠賞心無與共染

翰獨踟躕元帝春日新鶯隱葉轉新燕向窓飛柳絮

時依酒梅花乍入衣玉珂逐風度金鞍映日輝無令春
色晚獨望行人歸 〔望春〕葉濃知柳密花盡覺梅疎蘭
生未可握蒲小不堪書 〔江淹〕當春四韻雷萌山中草
雲煦江上花流煙漾璇景輕風泛凌霞我有幽蘭念銜
意矚望斜友人殊未還獨慰檐前華 〔虞羲〕春郊光風
轉蕙晦香霧鬱蘭津暄遲蝶弄蘂景麗鳥和春樵歌喧
隴暮漁樵亂江晨山中芳杜若依依獨思人 〔王筠〕春
遊叢蘭已飛蝶楊柳未藏鴉物色相煎蕩微步出東家
既同翡翠翼復如桃李花欲以千金笑迴君流水車
鮑泉春日 〔新燕〕始新歸新蝶復新飛新花滿新樹新月
麗新暉新光新氣早新望新盈抱新水新綠浮新禽新

聽好新景自新還新葉復新攀新枝雖可結新愁詎解
顏 蕭瑱春日貽劉孝綽澗水初流碧山櫻早發紅新
禽爭弄響落蕊亂從風拂檐多軟幹映戶悉花叢誰云
相去遠垂柳對高桐 聞人舊春日高臺動春色清池
映日華綠葵向光轉翠柳逐風斜林有鳴心鳥園多奪
目花相與咸知節嘆子獨離家 陳徐陵春日岸煙起
暮色岸水帶斜暉徑狹橫枝度簾搖驚燕飛落花承步
履流澗寫行衣何殊九枝蓋薄暮洞庭歸 周庾信詠
春逍遙遊桂苑寂絕想桃源狹石分花徑長橋映水門
管聲驚百鳥人衣香一園定知歡未足橫琴坐樹根

楊師道春朝閒步休沐乘閒豫清晨步百林池塘藉芳

草蘭芷襲幽衿霧中分曉日花裏弄春禽野徑香恒滿
山堦筍屢侵何須命輕蓋桃李自成陰 **原**唐李白春

思燕草如碧絲秦桑低綠枝當君懷歸日是妾斷腸時
春風不相識何事入羅幃 **增**張子容春江花月夜林

花發岸口氣色動江新此夜江中月流光花上春分明
石潭裏宜照浣紗人 **王維**贈裴十迪風景日夕佳與

君賦新詩澹然望遠空如意方支頤春風動百草蘭蕙
生我籬曖曖日暖閨田家來致詞欣欣春還臯淡淡水

生敗桃李雖未開萸萼滿芳枝請君理還策敢告將農
時 **韓愈**感春偶坐藤樹下暮春下旬間藤陰已可庇

落蕊還漫漫疊疊新葉大瓏瓏晚花乾青天高寥寥兩

蝶飛翻翻時節適當爾懷悲自無端

孟郊長安早春

旭日朱樓光東風不驚塵公子醉未起美人爭探春探
春不爲桑探春不爲麥日日出西園祇望花柳色乃知
田家春不入五侯宅 獨孤及山中春思 獺祭川水大
人家春日長獨謠晝不暮搔首慚年芳靡草知節換含
葩向新陽不嫌三徑深爲我生池塘亭午井竈聞雀聲
響空倉花落沒屐齒風動羣木香歸路雲水外天涯杳
茫茫獨卷萬里心深入山鳥行芳景物相迫春愁未遽
忘 權德輿春日戲題 江春好游衍處處芳菲積綵舫
入花津香車依柳陌綠楊煙裊裊紅蕊鶯寂寂如何愁
思人獨與風光隔 宋曾鞏和張友直城東春日 東流

抱孤城雨洗見春色風吹百草根道路千里碧莫盡溪
漫漫波瀾散無跡遙林缺見山冉冉蒼藹積沙禽有行
蹤文字不可識青松對桃李桃紅李花白紅白勢方競
青青守巖側君意無不諧研談欲俱得賦詩多所陳炳
若觀龜拆城東不待到衆物已歷歷朱子春日言懷
春至草木變郊園猶掩扉茲晨與心會覽物徧芳菲桃
萼破淺紅時禽悅朝暉泉谷暖方融原田水初肥東作
興庶眊歲功始在茲端居適自慰世事復有期終然心
所向農畝還當歸元吳師道德興開化道中春晨氣
澄穆雜卉香滿路百舌鳴高林墟煙淡如霧農夫啓門
出在野各有務行人獨何爲憧憧自來去兩崖蒼石

間湍水激清瀉山桃爛紅芳光影連上下春風忽怒起
意乃嬉行者飛花撲人來攬之欲盈把
倪瓚春日雲

林齋居池泉春漲深徑苔夕陰滿諷詠紫霞篇馳情華
陽館晴嵐拂書幌飛花浮茗盃階下松粉黃窓間雲氣
暖石梁蘿蔦垂翳翳行蹤斷非與世相違冥栖久忘返
七言古詩

增

陳賀循庭中有奇樹三春節物始芳菲遊

絲細草動春暉香風飄舞花間度好鳥和鳴枝上飛臨
池間竹偏增綠依堦映雪紛如玉溫室庭前竟不言鼓
吹樓中能作曲曾聞遠別舊難思攀折會取贈佳期長
條本自堪爲帶密葉由來好作幃星稀漢轉月輪明徘徊
夜鵲屢相驚欲識幽人蘭杜徑山窓芳桂復叢生

唐文德后遊春曲上苑杏花朝日明蘭闥艷妾動春情
井上新花偷面色簷前嫩柳效身輕花中去來看蝶舞
樹上長短聽流鶯林下何須遠借問出衆風流舊有名
溫庭筠陽春曲雲母空窓曉煙薄香昏籠氣凝暉閣
霏霏霧雨杏花天簾外春威著羅幕曲闌伏檻金麒麟
沙苑芳郊連翠茵馬何能鬻芳草路人不敢隨流塵
惜春詞百舌問花花不語低回似恨橫塘雨蜂爭粉
蕊蝶分香不似垂楊惜金縷願君留得長妖韶莫逐東
風還蕩搖秦女含嚬向煙月愁紅帶露空迢迢原宋
寇準江南春波渺渺柳依依孤村芳樹遠斜日杏花飛
江南春盡離腸斷蘋滿汀洲人未歸增歐陽修春寒

東風吹雲海天黑，饑龍凍雲雨不滴。噴雷隱隱愁煙白，宿露無光瑤草寂。東皇染花滿春園，天爲花迷惜春色。呼雲鏤月恐紅蕩，幾日春陰養花魄。悠悠遠絮縈空擲，愁思織春挽不得。高樓去天無幾尺，遠岫參差亂屏碧。

〔徐積〕江南春今年是處春風早，江南地暖春逾好。春風次第入江山，先入梅花旣芳草。芳草春深似有情，眞共江山到洞庭。落花流水武陵道，湖中有山春更斜。陽西落一點，明少年莫上岳陽城。〔陸游〕雨霽出遊十日苦雨一日晴，拂拭拄杖西村行。清溝泠泠流細水，好風習習吹衣輕。四鄰蛙聲已閣閣，兩岸柳色爭青青。辛夷先開半委地，海棠獨立方傾城。春工遇物初不擇，亦

秀燕麥開蕪菁薺花如雪又爛熳百草紅紫那知名小
魚誰取置道側細柳穿頰危將烹欣然買放寄吾意草
萊無地蘇疲氓元周權春日卽事吳蠶欲老疇未秧
拍隄野水迴橫塘淡煙疎樹綠陰薄落花飛絮白日長
寒具油乾過冷節匆匆芳事歸鸚鵡枕書睡足午窓明
雪乳浮浮翻兔褐

五言律詩

御製春日郊行春殿晴雲曉鑾輿出禁闈桃花臨紫陌柳色
啓青暉細雨清塵界和風散德威馬嘶馳道遠滿地盡芳
菲玉泉春曉郊墅初晴後芳春曙色旋孤巒堆畫障細
穴吐新泉浪靜鮮鱗躍風恬紫葍妍怡情看萬象浩浩思

無邊 春日觀花枝上流鶯蚤千紅萬紫香氣融催景麗
風過遞年芳穠李花猶淺垂楊葉未長澗中春溜發疑是
奏笙簧

增唐宋之間春日芙蓉園侍宴芙蓉秦地沼盧橘漢家
園谷轉斜盤徑川迴曲抱源風來花自舞春入鳥能言
侍宴瑤池夕歸途騎吹繁 年光竹裏徧春色杏間遙
煙氣籠青閣流文蕩畫橋飛花隨蝶舞艷曲伴鶯嬌今
日陪歡豫還疑陟紫霄 **原**杜甫春夜喜雨好雨知時
節當春乃發生隨風潛入夜潤物細無聲野徑雲俱黑
江船火獨明曉看紅濕處花重錦官城 **增**秦系春日
閒居一似桃源隱將今過客迷礙冠門柳長驚夢院鶯

啼澆藥泉流細圍碁日影低舉家無外事共愛草萋萋

〔王建〕長安春遊騎馬傍闌坊新衣著雨香桃花紅粉

醉柳絮白雲狂不覺愁春去何曾得日長牡丹相次發

城裏又須忙〔韋述〕春日山莊初歲開韶月出家喜載

陽晚晴搖水態遲景蕩春光浦淨漁舟遠花飛樵路香

自然成野趣都使俗情忘〔元稹〕遣春失却游花伴因

風浪引將柳堤遙認馬梅徑誤尋香晚景行看謝春心

漸欲狂園林都不到何處枉風光〔于良史〕春山月夜

春山多勝事賞翫夜忘歸掬水月在手弄花香滿衣興

來無遠近欲去惜芳菲南望鳴鐘處樓臺深翠微〔李

商隱〕判春一桃復一李井上占年芳笑處如臨鏡窺時

不隱牆敢言西子短誰覺宓如長珠玉終相類同名作

夜光 春宵自遣地勝遺塵事身閑念歲華晚晴風過

竹深夜月當花石亂知泉咽苔荒任徑斜陶然恃琴酒

忘却在山家 春遊橋峻斑駁疾川長白鳥高煙輕唯

潤柳風濫欲吹桃徙倚三層閣摩挲七寶刀庾郎年最

少青草妒春袍 李中喜春雨有寄青春終日雨公子

莫思情任阻西園會且觀南畝耕最憐滋隴麥不恨濕

林鶯父老應相賀豐年兆已成 僧貫休春興柳暖鶯

多語花明草盡長風流在詩句牽率繞池塘叫切禽名

宇飛狂蝶姓莊時來真可惜自勉掇蘭芳 原僧皎然

春興片雨拂檐楹煩襟四座清霏微過麥隴蕭散傍莎

城靜愛和花落幽聞入竹聲朝觀趣無限高詠寄閒情

增

宋梅堯臣和元與遊春韻乘閒多野興信馬與君

行碧樹斜通市清流曲抱城山花高下色春鳥短長聲
日暮吾廬近還歌空復情春陰濃淡雲無定淒微氣

宇寒鳩鳴桑葉吐村暗杏花殘客子行裘薄春塘野水
寬輕雷欣已發謬作採茶官李彌遜春日雜韻幽栖

足春事晴日苦相催屐齒穿沙穩筇鬚礙竹回光風初
轉蕙殘雪欲欺梅自是經過少柴門日日開真山民

春遊春光潑眼明占勝得新亭棠醉風扶起柳眠鶯喚
醒非無杯泛綠安得鬢皆青且事日爲樂歌聲莫暫停

元陳樵春日細雨花陰重輕煙草色勻驚禽長遊客

嬌燕却依人絃管紅樓酒踈蹀紫陌塵東風競遊賞因
想上林春 [葉顥春日] 曉洞雲歸濕青山草木新天桃
含宿雨嫩柳裊輕塵蝶翅寒猶怯蜂衙晚漸陳香風簇
羅綺已有蹋青人

七言律詩

御製景山春望雲霄千尺倚丹丘輦下山河一望收鳳翥中
天連紫闕龍蟠北極壯皇州煙生沆瀣春初麗露濕芙蓉
翠欲流却向閭閻看郅屋崇高還厯廟堂憂 [後苑漫興]
佳氣青蔥繞苑牆紅泉紫岫勝雲莊雕欄細草經春滿綺
閣繁花入午香雨露生成隨品類鳶魚飛躍自低昂閑亭
久坐渾無事靜對琴書覺意長

增唐張謂春園家晏南園春色正相宜大婦同行少婦

隨竹裏登樓人不見花間覓路鳥先知櫻桃解結垂簷
子楊柳能低入戶枝山簡齋來歌一曲參差笑煞郢中
兒包何和程員外春日東郊卽事郎官休浣憐遲日

野老歡娛爲有年幾處折花驚蝶夢數家留葉待蠶眠
藤垂委地縈珠寶泉迸侵堦浸綠錢直到閉關朝謁去
鶯聲不散柳含煙李紳憶春日曲江宴後許至芙蓉

園春風上苑開桃李詔許看花入御園香徑草中迴玉
勒鳳凰池畔泛金樽綠絲垂柳遮風暗紅藥低叢拂砌
繁歸繞曲江春景晚未央明月鎖千門王建春日五

門西望百官朝下五門西塵起春風過玉堤黃帕蓋鞍

呈過馬紅羅纏頸鬪回雞館松枝重牆頭出御柳條長
水面齊唯有教坊南草色古苔陰地冷萋萋
長安春遊鳳城春報曲江頭上客年年是勝遊日暖雲
山當廣陌天清絲管在高樓蘂蔥樹色分仙閣縹緲花
香泛御溝桂壁朱門新邸第漢家恩澤問鄴侯
白居易
易錢塘湖春行孤山寺北賈亭西水面初平雲脚低幾
處早鶯爭暖樹誰家新燕啄春泥亂花漸欲迷人眼淺
草纔能沒馬蹏最愛湖東行不足綠楊陰裏白沙堤
杭州春望望海樓明照曙霞護江堤白蹋晴沙潮聲夜
入伍員廟柳色春藏蘇小家紅袖織綾誇柿蒂青旗沽
酒趁梨花誰開湖寺西南路草綠裙腰一道斜
認春

認得春風先到處西園南面水東頭柳初變後條猶重
花未開前枝已稠暗助醉顏尋綠酒潛添睡興著紅樓
知君未別陽春數直待春深好擬遊
溫庭筠春日野
行日西塘水金堤斜碧草芊芊暗吐芽野岸明媚山芍
藥水田叫噪官蝦蟆鏡中有浪動菱蔓陌上無風飄柳
花何事輕橈向溪客綠萍方好不還家
方干春日年

去年來似有期日高添睡是春時雖將細雨催蘆筍却
用東風染柳絲重霧已應吞海色輕霜何事挫花枝此
時野客因花醉醉臥花間應不知
宋陳襄春日賞林
亭把酒春亭覽衆芳水精簾箔逗山光孤松冷落千年
換野槿紛華一日香綠圃煙深迷蛺蝶曲池波暖睡鴛

鵞文園莫惜鷄裘費買取宜城作醉鄉

王廷珪春日

山行緩鞚青絲馬不嘶春山草長靜山扉
迸林新筍斑斑出隔水幽禽欵欵飛
雨過泉聲鳴嶺背日長花氣撲人衣
雲藏遠岫茶煙起知有僧居在翠微
陸游春日小園市塵不到放翁家
繞麥穿桑野徑斜夜雨長深三尺水
曉寒留得一分花悶從鄰舍分春瓮
閒就僧窓試露芽自此年光應更好
日驅秧馬聽縑車雨霽春色粲然喜
而有賦應接年光日漸慵猶能一飲
百花空半霑蝶粉簾櫳雨遠送鶯聲
巷陌風千縷麴塵楊柳綠萬枝
猩血海棠紅從來造物陶甄手却在
閒人詩句中朱子和秀野韻江臯晴日
麗芳華翠竹疎疎映白沙路

轉忽逢沽酒客眼明惟見滿園花望中景助詩人趣物
外春歸釋子家向晚却尋芳草徑夕陽流水遶村斜

戴昺春事春事關心常起蚤愛看景物試凭欄戲魚池
面微添綠嘯鳥枝頭尚帶寒斬棘重樊新插柳對泉頻
灌自栽蘭年年賸有園林興每恨廬邊地不寬 方岳

春日雜興高下雲藏野老家縱橫水漱竹籬斜勒將春
去許多雨流出山來都是花白首風煙三徑草清時鼓
吹一池蛙身閒不耐閒雙手洗甌炊香夜作茶 南岡

北嶺對窓扉看盡朝嵐與夕霏社後未曾聞燕語雨中
誰不惜花飛山醅約莫幾時熟沙筍輪囷一尺圍莫怨
風光損桃李荼蘼芍藥又芳菲 高翥春日湖上清波

門外放船時盡日輕寒戀客衣花下笑聲人共語柳邊
檣影燕初飛曉風不定棠梨瘦夜雨相連薺麥肥最憶
故山春正好夜來先遣夢魂歸

真山民春曉雨破曉

檐花未放乾披衣和夢倚闌干釀成苔暈地猶濕老盡
鶯聲風正寒無客醉敲金鞮響有人睡怯翠衾單牡丹
一夜成消瘦下却珠簾不忍看

元宋元春日野步翳

日橙陰翠幄遮葑圃高下爽榭斜陂塘幾曲深淺水桃
李一溪紅白花頰尾自跳魚放子綠頭相並鳴眠沙春
郊景物堪圖寫輸與煙樵雨牧家

原明陸樹聲一番

風雨釀重陰雲樹蒼茫自遠林徑滿煙蘿園作障石分
泉路細鳴琴青門插柳關幽思紫陌行春滯賞心最是

桃花爭欲放，不禁庭院曉寒侵。
曹大章東風綠草到平臺，
小檻晴臨曲礪隈。月影上洲楊柳亂，
霧香沾酒杏花開。佳人步郭逢君飲，
臥病憐春強自來。尋勝正當花度日，
蕊宮鶯蝶一齊回。
于若瀛不問深紅與淺紅，
名園次第暗芳叢。乍隨絮逐仍依草，
忽向西飛又轉東。嫩碧朝添睂自恨，
流黃夜罷錦成空。年年一度開還落，
始信隋家翦未工。

五言排律

增

唐王叡春草碧色習習東風扇，
萋萋草色

新淺深千里碧，
高下一時春。嫩葉舒煙際，
微香動水濱。金塘明夕照，
輦路惹芳塵。造化功何廣，
陽和力自均。今當發生日，
瀝懇祝良辰。
張嗣初賦得春色滿皇州何

處年華好。皇州淑氣，勻朝陽潛應。律草木暗迎春，柳變
金隄畔。蘭抽曲水濱。輕黃垂輦道，微綠映天津。麗景浮
丹闕，晴光擁紫宸。不知幽遠地，今日幾枝新。
〔李商隱〕
永樂縣所居一草一木無非自栽。今春悉已芳茂。因書
卽事一章。手種悲陳事，心期翫物華。柳飛彭澤雪，桃散
武陵霞。枳嫩栖鸞葉，桐香待鳳花。綬藤縈弱蔓，袍草展
新芽。學植功雖倍，成蹊跡尚賒。芳年誰共翫，終老邵平
瓜。
〔李郢〕春日題山家，偶與樵人熟。春殘日，日來依崗
尋紫菊，挽樹得青梅。燕靜銜泥起，蜂喧抱蕊回。嫩茶重
攪綠，新酒畧吹醅。漠漠蠶生紙，涓涓水弄苔。丁香正堪
結，留步小庭隈。
〔鄭谷〕木向榮園林，青氣動衆木。散寒

聲敗葉牆陰在滋條雪後榮欣欣春令早藹藹日華輕
庾嶺梅先覺隋堤柳暗驚山川應物候臯壤起農情祇
待開花日連栖出谷鶯

五言絕句

御製春夜玉鑪煙靄盡夜靜百花香曙氣浮丹陛春光拂象

牀

增唐張九齡荅韋博士上苑春先入中園花盡開唯餘

幽徑草尚待日光催張起春情畫閣餘寒在新年舊

燕歸梅花猶帶雪未得試春衣張紳素春遊曲萬樹

江邊杏新開一夜風滿園深淺色照在綠波中煙柳

飛輕絮風榆落小錢濛濛百花裏羅綺競秋千孟郊

續集卷之四 詩譜 春

春後雨昨夜一霎雨。天意蘇羣物。何物最先知。虛庭草
爭出。王建春意。雖是杏園主。一株臨古岐。從傷春意
早。乞取舊開枝。權德輿春日戲題。隨風柳絮輕。映日
杏花明。無柰花深處。流鶯三數聲。許渾長安早春雲
月有歸處。故山清洛南。秦城一花落。春夢滿江潭。宋
陸游春雨。湖上新春柳。搖搖欲喚人。多情今夜雨。先洗
馬蹏塵。楊萬里春日日落碧簪。外人行紅雨中。幽人
詩酒裏。又是一春風。

七言絕句

御製春日佳氣山川浹。地行物隨節候變。初晴雪消樹底花
爭發。冰泮池頭草欲生。春晴舟中作。野水漫漫野岸長。

幾行嫩柳帶斜陽不知春色來多少但覺花飛處處香

唐

岑參山房春事風恬日暖蕩春光戲蝶遊蜂亂入

房數枝門柳低衣桁一片山花落筆牀王維遊春詞

經過柳陌與桃溪尋逐春光著處迷鳥度時時衝絮起

花繁滾滾壓枝低韋應物春思野花如雪繞江城坐

見年芳憶帝京開闔曉開凝碧樹曾陪鸚鵡聽流鶯

錢起春郊水透冰渠漸有聲氣融煙霧晚來明東風好

作陽和使蓬草逢花報發生盧綸曲江春望菖蒲翻

葉柳交枝暗上蓮舟鳥不知更到無花最深處玉樓金

殿影參差翫春因寄馮衛二補闕戲呈李益掖垣春

色自天來紅藥當階次第開萱草叢叢爾何物等閒穿

破綠莓苔

韓愈曲江春遊寄白二十二舍人漠漠輕

陰晚自開青天白日映樓臺曲江水滿花千樹有底忙
時不肯來白居易晚春書靜簾疎燕語頻雙雙鬪雀

動堦塵柴扉日暮隨風掩落盡閑花不見人元稹與

吳侍郎春遊蒼龍闕下陪驄馬紫閣峰頭見白雲滿眼

流光隨日度今朝花落更紛紛李賀南園花枝草蔓

眼中開小白長紅越女腮可憐日暮媽香落嫁與春風

不用媒李約江南春池塘春暖水紋開堤柳垂絲問

野梅江上年年芳意早蓬瀛春色逐潮來羅鄴春日

題城南韋曲韋曲城南錦繡堆千金不惜買花栽誰知

豪貴多羈束落盡春紅不見來韋莊春陌滿街芳草

卓香車仙子門前白日斜腸斷東風各回首一枝春雪
凍梅花 [王周問春] 遊絲垂幄雨依依枝上紅香片片
飛把酒問春因底意爲誰來後爲誰歸 [春荅花枝千
萬趁春開] 三月闌珊卽自回剩向東園種桃李明年依
舊爲君來 [劉兼春遊] 柳成金穗草如茵載酒尋花共
賞春先入醉鄉君莫問十年風景在三秦 [宋寇準春
晝偶書] 白晝偶成芳草夢起來幽興有新詩風簾不動
黃鸝語坐見庭花日影移 [趙抃賞春亭] 滂葩浩艷滿
亭隈當席芳樽醉看來始信君恩不私物亂山窮處亦
花開 [歐陽修豐樂亭遊春] 綠樹交加山鳥噉晴嵐蕩
漾落花飛鳥歌花落太守醉明日酒醒春已歸 [春雲

澹澹日輝輝草惹行襟絮拂衣行到亭西逢太守籃輿
酪酏插花歸紅樹青山日欲斜長郊草色綠無涯遊
人不管春將老來往亭前蹋落花〔王珪宮詞〕麗日祥
煙鎖禁林櫻桃初熟杏成陰年年翠輦來遊幸花落春
宮一寸深〔王安石春風〕春風過柳綠如縑晴日蒸紅
出小桃池暖水香魚沒處一環清浪湧亭臯〔秦觀春
日〕黃金菽菽滿垂楊尚有春寒到畫堂酒力漸消歌扇
怯入簾飛雪帶梅香〔崔鶉春日村居〕春草門前已沒
靴更無人過野人家離離細竹時聞雨淡淡疎簾不隔
花〔王鎡〕橋春望拾翠車間輦路塵山南山北杜鵑
春誰家庭院東風裏吹出桃花不見人〔金元好問梁

園春暖入金溝細浪添津橋楊柳綠纖纖賣花聲動天
街遠幾處春風揭繡簾元薩都刺春日偶成蹋馬歸
來過早春空階已見草如茵東風吹綠青溪柳馬上輕
寒不著人馬臻春日閒居茶香庭院一枰棋柳影侵
堦日自移因見刺桐花滿樹等閒憶煞故園時西湖
春日要囑園丁取折枝紅桃白李紫薔薇石函橋畔人
煙晚挑得春光一擔歸春日幽居淺淺春風尚帶寒
日斜香篆半燒殘杏花一樹開如錦怕觸啼鶯不倚闌
釋石屋山居吟滿山筍蕨滿園茶一樹紅花間白花
大抵四時春最好就中尤好是山家

詩散句

增

晉陶潛歡言酌春酒摘我園中蔬

齊謝朓

喧鳥覆春洲雜英滿芳甸
梁沈約春風搖雜樹葳蕤

綠且丹
蕭子範春情寄柳色鳥語出梅中
陳張正

見春光落雲葉花影發晴枝
唐王勃草綠縈春帶榆

青綴古錢
芳樹搖春晚晴雲入座飛
岑參竹深喧

暮鳥花缺露春山
鶯聲隨坐嘯柳色喚行春
原杜

甫漢節梅花外春城海水邊
夜雨翦春韭新炊間黃

梁野館濃花發春帆細雨來
一徑野花落孤村春

水生
雲溪花淡淡春郭水泠泠
錢起蘭蕙暖初

吐春鳩鳴欲巢
嚴維柳塘春水慢花塢夕陽遲
李

嘉祐野渡花爭發春塘水亂流
儲嗣宗鶴語松上月

花明雪裏春
劉禹錫花含欲語意草有鬪生心
柳

宗元平野春草綠晚鶯嘯遠林
白居易紅簇交枝杏

春含卷葉荷
春樹花珠顆春塘水麴塵
崔塗忽覺

草木變始知天地春
曹松御柳舞著水野鶯嘯破春

宋余靖松溪千蓋雨茶圃一旗春
司馬光草遶春

街碧花繁夕市紅
毛滂春渚連天濶春風夾岸香

王安石冉冉春行暮菲菲物競華
蘇軾行看花柳動

共享無邊春
晁補之春風入木心皮肌發紅綠
吳

中復花涵清露曉風卷綠波春
元馬祖常竹光浮晝

碧花蕊颺春紅
陳樵春風何處來草木忽已榮
倪

瓊靡蕪細雨濕桃李春風寒
馬臻淑氣浮芳鮮山澤

一時綠
原馮琦梅圃懸春月松扉拂澗虹
增唐王

廣文書局影印
天詩譜一春
卷

維草色全經細雨濕花枝欲動春風寒 李白長安白

日照春空綠楊結煙垂裏風 杜甫落花遊絲白日靜

鳴鳩乳燕青春深 李賀朱城報春更漏轉光風催蘭

吹小殿 溫庭筠霏霏霧雨杏花天簾外春威著羅幕

曹松半夜笙歌教洗月平明桃李放燒春 司空圖

孤嶼池痕春漲滿小欄花韻午晴初 宋韓琦草濕漫

鋪留醉席榆寒難掃買春錢 石延年鶯聲不逐春光

老花影長隨日脚流 王安石濃綠萬枝紅一點動人

春色不須多 蘇軾臥聞百舌呼春風起尋花柳村村

同 陋巷關門負朝日小園除雪得春蔬 浥浥爐香

初泛夜離離花影欲搖春 陸游小桃婀娜并芳柔紅

蘭茁芽滿春洲 小樓一夜聽春雨深巷明朝賣杏花

新陽蘇醒春前柳輕暖醫治雪後梅 春深水暖多

魚婢雨足年豐少麥奴 靜院春風傳浴鼓畫廊晚雨

濕茶煙 元耶律楚材花藏徑畔春泉碧雲散林梢晚

照明 郝經四圍紅錦春風軟滿地綠陰春晝長 許

衡萬樹春紅羅錦綺一灣晴碧捲玻璃 王暉花枝入

簾春夢香遊絲翻空清晝長 許謙春風生草雉堞青

隨處軟茵供小坐 倪瓚柳絮如煙迷曉浦杏花飛雪

點春波 顧阿瑛桃花亭亭笑酣春溪邊浣花染溪水

馬臻蟄雷夜送催花雨香徑春迷鬪草人 唐上官

儀春堤芳草積 杜甫春風花草香 武元衡春風綻

百花

白居易春染柳梢黃

韋莊杏花春陌馬聲嬌

宋劉筠杏梁春晚燕占泥

宋祁風光駘蕩百花春

蘇軾滿地春風掃落花

陸游春晚江邊草過腰

春近野梅香初動

元虞集山雨欲來春樹暗

桃花

吹雨春牽纜

周權渚波春綠荻芽新

郭鈺野徑春

煙匝翠蘿

萬絲煙柳鎖春晴

葉顒隔溪春色兩三

花

詞增

唐馮延巳三臺令春色依舊青山紫陌日斜

柳暗花鶯醉臥春風少年少年少行樂直須及早

王建三臺令蝴蝶蝴蝶飛上金枝玉葉君前對舞春風

白葉桃花樹紅紅樹紅樹燕語鶯囀日暮

宋毛滂憶

秦娥夜夜夜了花朝也連忙指點銀瓶索酒嘗 明朝

花落知多少莫把殘紅掃愁人一片花飛減却春 洪

适生查子桃疎蝶惜春柳困鶯銜絮日影過簾旌多少

閒愁緒 紅綻武陵溪綠暗章臺路春色似行人無意

花間住 唐和凝春光好蘋葉軟杏花明畫船輕雙浴

鴛鴦出綠汀棹歌聲 春水春風無浪春天半雨半晴

紅粉相隨南浦晚幾含情 宋張榘浣溪沙習習輕風

破海棠鞦韆移影上迴廊畫長蝴蝶爲誰忙 度柳早

鶯分暖綠過花小蝶帶春香滿庭芳草又斜陽 高觀

菩薩蠻春風吹綠湖邊草春光依舊湖邊道玉勒錦障

泥少年遊冶時 煙明花似繡且醉旗亭酒斜日照花

西歸鴉花外曉

程垓菩薩蠻畫橋泊泊春江綠行人

正在春江曲花潤接平川有人花底眠

東風原自好

只怕催花老安得萬垂楊繫教春日長

周密謁金門

芳事晚數點杏鈿香淺惻惻輕寒風翦翦錦屏春夢遠

穉柳拖煙嬌軟花影暗藏深院初試輕衫并畫扇

丹紅未展

李之儀好事近春到雨初晴正在小樓時

節柳眼向人微笑傍闌干堪折

暮山濃淡瑣煙霏梅

杏半明滅玉笋莫辭沉醉判歸時斜月

唐歐陽炯清

平樂春來階砌春雨如絲細春徑滿飄紅杏蒂春燕舞

隨風勢春幡細縷春繪春閨一點春燈自是春心撩

亂非關春夢無憑

宋王安國清平樂留春不住費盡

鶯兒語滿地殘紅宮錦污昨夜南園風雨 小憐初上
琵琶曉來思繞天涯不肯畫堂朱戶春風自在楊花

王安中清平樂花時微雨未減春分數占取簾疎花密
處把酒聽歌金縷 斜風輕度濃香閒情正與春長向

晚紅燈入坐嘗新青杏隨觴 盧祖臯西江月燕掠晴

絲裊裊魚吹水葉粼粼禁街微雨灑芳塵寒食清明相
近 謾著宮羅試暖閒呼社酒酬春晚風簾幕悄無人

二十四番花信 毛滂西江月煙雨半藏楊柳風花初

著桃花玉人細細酌流霞醉裏將春留下 柳外鴛鴦
作伴花邊蝴蝶爲家醉翁醉也且由他月在柳橋花下

周密西江月波影暖浮玉鬢柳陰深鎖金鋪湘桃花

褪燕調雛又是一番春暮 碧桂情深鳳怨雲屏夢淺
鶯呼繡窻人倦冷薰爐簾影搖搖亭午 吳潛南柯子

池水凝新碧欄花駐老紅有人獨倚橋東手把一枝楊
柳繫春風 鵲伴遊絲墮蜂黏落蕊空秋千庭院小簾
櫳多少閒情閒緒雨聲中 楊无咎於中好墻頭艷杏

花初試繞珍叢細按紅蕊欲知占盡春明媚悄無意看
桃李 持杯準擬花間醉一葉兩葉飛墮晚來旋旋深
無地更聽得東風起 毛滂蹋莎行階影紅遲柳苞黃

徧纖雲弄日陰晴半重簾不捲篆香橫小花初破春叢
淺 鳳繡猶重鳴爐長暖屏山翠入江南遠醉輕夢短
枕閒欹綠窻窈窕風光轉 元何可視蝶戀花金井啼

鴉深院曉颺盡東風柳絮吹難了燕子多情相識早杏
梁依舊雙雙到 一縷沉煙簾幕悄滿眼飛花祇攪人
懷抱十二玉樓春樹杪天涯不斷青青草 [宋俞國寶
風入松] 一春長費買花錢日日醉湖邊玉驄慣識西湖
路驕嘶過沽酒樓前紅杏香中歌舞綠楊影裏秋千

暖風十里麗人天花壓鬢雲偏畫船載得春歸去餘情
付湖水湖煙明日重扶殘醉來尋陌上花鈿 [柳永木
蘭花慢] 坼桐花爛熳乍疎雨洗清明正豔杏燒林緗桃
繡野芳景如屏傾城盡尋勝賞驟雕鞍紺轡出郊坰風
暖繁絃脆管萬家競奏新聲 盈盈鬪草鬪青人豔冶
遞逢迎向路旁往往遺簪墜珥珠翠縱橫歡情對佳麗

地任金罍罄竭玉山傾
揀却明朝永日畫堂一枕春醒
黃機喜遷鶯平湖百畝種滿湖蓮葉繞堤楊柳冉冉
波光輝輝煙影空翠濕霑襟袖靜愜鄰雞啼午暖逼沙
鷗眠晝西園路更紅塵不斷蝶酣蜂瘦知否堪畫處
野薺蕪菁胷地鋪茵繡桃李陰邊桑麻叢裏斜蠹酒帘
誇酒竹寺小依山趾茅店平窺津口春又晚正香風有
客倚闌搔首

別錄

增

汜勝之書栽樹正月爲上時二月爲中時三月

爲下時然棗雞口槐兔目桑蝦蟇眼榆負瘤散其餘雜
木鼠耳蚩起各其時凡種栽并插皆用此等形象一本
草凡採根物多以春月採者謂春初津潤始萌未衝枝

葉勢力淳濃也 春月移栽各樹宜上半月前則茂而
結實移栽松柏槐柳桑柘橙橘各色樹皆可

佩文齋廣羣芳譜卷第一

佩文齋廣羣芳譜卷第二

天時譜

正月

立春雨水元日
人日上元附見

增禮記月令孟春之月日在營室昏參中日尾中**註**日
月會於娵訾而斗建寅之辰也 是月也天氣下降地

氣上騰天地和同草木萌動王命布農事命田舍東郊
皆修封疆審端徑術善相丘陵阪險原隰土地所宜五
穀所殖以教道民必躬親之田事既飭先定準直農乃
不惑 **梁元帝纂要**正月孟春亦曰孟陽孟陬上春初

春開春發春獻春首春首歲初歲開歲發歲獻歲肇歲
芳歲華歲 **原**花月令是月也迎春生櫻桃胎望春盈

眸蘭蕙芳李能白杏花飾其曆

增瓶史月表正月花

盟主梅花寶珠茶花客卿山茶鐵幹海棠花使令瑞香
報春木瓜 **花曆**正月瑞香烈徑草綠百花萌動

彙考

增

詩豳風

三之日于耜

疏

三之日三陽之月夏之

正月也于耜往修田器也

禮記月令是月也天子乃

以元日祈穀於上帝乃擇元辰天子親載耒耜措之于
參保介之御間帥三公九卿諸侯大夫躬耕帝籍天子

三推三公五推卿諸侯九推

周禮天官

上春詔王后

帥六宮之人而生種稷之種而獻之于王

夏小正正

月柳稊

註稊也者發莩也

梅杏棗桃則華 **註**棗桃山

桃也

大戴禮

孟春百草權輿

國語

太史順時覘土

農祥晨正土乃脈發註農祥天駟卽房星也晨正中也

謂正月初也 管子正月令農始作服於公田農耕及

雪釋耕始焉芸卒焉 原西京雜記戚夫人侍高帝常

以正月上辰出池邊盟濯食蓬餌以祓妖邪 西陽雜

俎北朝婦人正月進箕帚長生花 夢溪筆談正月陽

氣始建兆乎萬物故曰登明 續明道雜志紹聖戊寅

歲余在黃州見上元沽酒人頭已簪麥穗土人言當年

不爾 賞心樂事正月玉照堂賞梅叢奎閣賞山茶湖

山尋梅攬月橋看新柳 歲華紀麗正月二十三日聖

壽寺前蠶市張公詠始卽寺爲會使民鬻農器 立春

增禮記月令先立春三日太史謁之天子曰某日立春

盛德在木天子乃齋立春之日天子親帥三公九卿諸侯大夫以迎春於東郊

後漢書禮儀志

立春日夜漏

未盡五刻京師百官皆衣青衣郡國縣道官下至斗食令史皆服青幘立春旛施土牛耕人於門外以示兆民

易通卦驗

立春條風至冰解楊柳津

要覽

列子御

風常以立春歸於八荒是風至則草木發生

玉泉記

立春日取弘農宜陽金門山竹爲管河內葭草爲灰以

候陽氣

摭遺

東晉李鄂立春日命以蘆菔芹芽爲菜

盤相餽貺

四時寶鏡

立春日春餅生菜號春盤

景

龍文館記正月八日立春內出綵花賜近臣武平一應

制云鸞輅青旂下帝臺東郊上苑望春來黃鶯未解林

間轉紅蘂先從殿裏開畫閣條風初變柳銀塘曲水半
含苔欣逢睿藻光韶律更促霞觴畏景催是日中宗手
勅批云平一年雖最少文甚警新悅紅蘂之先開訝黃
鶯之未轉循還吟咀賞嘆兼懷今更賜花一枝以彰其
美所賜學士花竝令插在頭上後所賜者平一左右交
插因舞蹈拜謝時崔日用乘酣飲欲奪平一所賜花上
於簾下見之謂平一曰日用何爲奪卿花平一跪奏曰
讀書萬卷從日用滿口虛張賜花一枝學平一終身不
獲上及侍臣大笑因更賜酒一杯當時嘆美
齊人月
令立春日食生菜取迎新之意
東京夢華錄立春日
自郎官御史以上皆賜春幡勝入賀訖戴歸私第又士

大夫家翦綵爲春幡或綴於花枝之下或翦爲春蝶春
錢春勝以爲戲東坡立春日亦簪幡勝過子由諸子姪
笑指云伯伯老人亦簪花勝耶 **原**撫言安定郡王立

春日作五辛盤

增

修真秘言

立春日清朝北望有紫

綠白雲者爲三元君三素飛雲也蘇魏公作春帖子詞

萬年枝上看春色三素雲中望玉晨

熙朝樂事立春

舉酒縷切粉皮雜以七種生菜供奉筵間蓋古人辛盤

之遺意焉

雨水

增

孝經緯

立春後十五日斗指寅爲

雨水

七修類稿

雨水

月中天一生水春始屬木然

生木者必水也

元日

增

舊唐書姚璿傳

長壽二年元

日大雪上謂羣臣曰元日雪百穀豐此語有何故實璿

曰汜勝之書雪是五穀之精 四民月令梅花酒元日

服之却老

風土記

元日食五辛以煉形以助五臟

原

裴玄新語

正旦縣官殺羊懸其頭於門又磔雞以驅

之俗說以厭厲氣玄以問河南伏君伏君曰是月土氣上升草木萌動羊嚼百草雞啄五穀故殺之以助生氣

荆楚歲時記

正月一日進椒柏酒飲桃湯進屠蘇酒

膠牙餠下五辛盤造桃版著戶謂之仙木按四民月令

云過臘一日謂之小歲拜賀君親進椒酒椒是玉衡星

精服之令人身輕耐老柏是仙藥成公子安椒花銘則

曰肇惟歲首月正元日厥味惟珍蠲除百疾是知小歲

則用之漢朝元正則行之桃者五行之精厭伏邪氣制

百鬼也董勛云俗有歲首用椒酒椒花芬香故采花以
貢樽 風俗記正旦楚人上松柏頌周庾信有柏葉銘
清異錄咸通後士風尚於正旦未明佩紫赤囊中盛
人參木香如豆樣時時傾出嚼吞之至日出乃止號迎
年佩 石湖詩註成都元日滴酥爲花熬芋爲柳葉三
夕張燈如上元 熙朝樂事正月朔日簽柏枝於柿餅
以大橘承之謂之百事大吉 人日增景龍文館記景
龍四年七日宴大明殿賜王公以下綵縷人勝李嶠應
制詩桂吐半輪迎此夜萸開七葉應今朝蘇頲詩七葉
仙萸承月吐千林御柳拂烟開崔日用詩曲江苔色冰
前液上苑梅香雪裡飄 荆楚歲時記正月七日爲人

日以七種菜爲羹翦綵爲人或鏤金箔爲人以貼屏風亦戴之頸鬢又造花勝以相遺登高賦詩 上元增明

皇雜錄唐上元夜宮人以黃羅包柑遺近臣謂之傳柑

宴 原影燈記洛陽人家造芋郎君食之宜男女 荆

楚歲時記正月望日作豆糜以祀門戶先以柳枝插門

隨枝所指以酒脯飲食及豆粥插箸而祭 聞見近錄

紹聖二年上元幸集禧觀出宮花賜從駕臣僚各數十

枝時人榮之

集藻原梁昭明太子錦帶書北斗周天送玄冥之故節

東風拂地啓青陽之芳辰梅花舒兩歲之裝柏葉汎三

光之酒 曾宋張耒人日飲酒賦歲後七日其名曰人

黃羣芳譜 賦詩譜 正月 五

愛此嘉名飲酒歡欣豈竹木之始和生庶彙而施仁

明倪謙早春賦漏暖信于梅枝兮見天心之來復窺韶

光于柳眼兮驗百卉之回綠顧起元元夕賦霧澈風

隄乍旖旎以醒柳霜墟冰嶠尚參差而落梅

五言古詩增梁沈約初春夾道覓陽春相將共攜手草

色猶自腓林中都未有無事逐梅花空教信楊柳且復

歸去來含情寄杯酒周宗慄蚤春昨暝春風起今朝

春氣來鶯鳴一雨轉花樹數重開散粉成初蝶翦綵作

新梅遊客三千里無暇上高臺隋薛道衡人日入春

纔七日離家已二年人歸落鴈後思發在花前唐白

居易立春後五日立春後五日春態紛婀娜白日斜漸

長碧雲低欲墮殘冰折玉片新萼排紅顆遇物盡欣欣
愛春非獨我迎芳後園立就暖前簷坐還有惆悵心欲
別紅爐火

七言古詩增唐李賀正月樂詞上樓迎春新春歸暗黃
著柳宮漏遲薄薄淡靄弄野姿寒絲幽風生短絲錦牀
曉臥玉肌冷露臉未開對朝暝官街柳帶不堪折早晚
菖蒲勝縮結

五言律詩

御製元夜與諸王宴飲乾清宮今夕丹帷宴聯翩集懿親傳
柑宜令節行葦樂芳春香泛紅螺重光搖絳蠟新不須歌
湛露明月足留人

增唐虞世南奉和獻歲讌宮臣履端初啓節長苑命高
筵肆夏喧金奏重潤響朱絃春光催柳色日彩泛槐烟
微臣同濫吹謬得仰鈞天 盧照鄰元日述懷筮仕無
中秩歸耕有外臣人歌小歲酒花舞大唐春草色迷三
徑風光動四鄰願得長如此年年物候新 高紹晦日
宴高氏林亭嘯侶入山家臨春翫物華葛絲調綠水桂
醕酌丹霞岸柳開新葉庭梅落早花興洽林亭晚方還
倒載車 嚴維晦日宴遊晦日湔裾俗春樓致酒時出
山還已醉謝客舊能詩溪柳薰晴淺巖花待閏遲爲邦
久無事比屋自熙熙 白居易新居早春靜巷無來客
深居不出門鋪沙蓋苔面掃雪擁松根漸暖宜閒步初

晴愛小園見花都未有唯覺樹枝繁
曹松立春春日

一杯酒便吟春日詩木梢寒未覺地脈暖先知烏轉星

沉後山分雪薄時寧無翦花手贈與最芳枝
宋呂夷

簡江南立春灰律何時應江春昨夜來細風先動柳殘

雪不藏梅餘冷迷清管微和發凍醅閉門無客到樽俎

爲誰開
宋伯仁歲旦居閒無賀客早起但如常桃版

隨人換梅花隔歲香春風回笑語雲氣卜豐穰柏酒何

勞勸心康壽自長
元趙孟頫早春谿上春無賴清晨

坐水亭草芽隨意綠柳眼向人青初日收濃霧微波亂

小星誰歌採蘋曲愁絕不堪聽

七言律詩增唐韋元旦奉和立春遊苑迎春應制灞浹

長安恒近日殿正臘月早迎新池魚戲葉仍含凍宮女
裁花已作春向苑雲疑承翠幄入林風若起青蘋年年
斗柄東無限願挹瓊觴壽北辰 馬懷素奉和立春遊
苑迎春應制元籥飛灰出洞房青郊迎氣肇初陽仙輿
暫下宜春苑御醴行開薦壽觴映水輕苔猶隱綠緣隄
弱柳未輸黃惟有裁花飾簪鬢恒隨聖藻狎年光 杜
甫立春春日春盤細生菜忽憶兩京梅發時盤出高門
行白玉菜傳纖手送青絲巫峽寒江那對眼杜陵遠客
不勝悲此身未知歸定處呼兒覓紙一題詩 戴叔倫
和汴州李相公勉人日喜春年來日日春光好今日春
光好更新獨獻菜羹憐應節遍傳金勝喜逢人烟添柳

色看猶淺鳥踏梅花落已頻東閣此時聞一曲翻令和者不勝春

原韋莊立春

青帝東來日馭遲暖烟輕逐

曉風吹麝袍公子樽前覺錦帳佳人夢裏知雪圃乍開紅菜甲綵幡新翦綠楊絲殷勤爲作宜春曲題向花牋貼繡楣

增

宋韓琦至和乙未元日立春元日難逢是

立春普天誰不喜佳辰一年氣候均諸節萬卉芳菲實九旬柏葉始傾爲壽酒土牛隨示力耕人故陰盡革無餘臘端朔陽來慶共新

蘇軾正月二十日往岐亭郡

人潘古郭三人送予於女王城東禪莊院十日春寒不出門不知江柳已搖村稍聞泱泱流冰谷盡放青青沒燒痕數畝荒園留我住半瓶濁酒待君溫去年今日關

山路細雨梅花正斷魂
〔范成大〕立春日郊行竹擁溪

橋麥蓋坡土牛行處亦笙歌
麴塵欲暗垂垂柳醉面初
明淺淺波日滿縣前春市合
潮平浦口暮帆多春來不
欲兼無句奈此金旛綵勝何
〔陸游〕立春前一日作開

年化日已舒長漸見風和鳥
變吭冒土萱芽穿嫩綠拂
橋柳色弄輕黃重溫壽酒屠
蘇醞探借春盤餅餌香不
入城門今幾歲遙知車馬正
匆忙
〔立春日〕日出風和

宿醉醒山家樂事滿餘齡年
豐臘雪經三白地暖春郊
已遍青菜細簇花宜薄餅酒
香浮蠟瀉長瓶湖村好景
吟難盡乞與侯家作畫屏
〔朱淑真〕立春停杯不飲待
春來和氣先春動六街生菜
乍挑宜捲餅羅幡旋翦稱

聯釵休論殘臘千重恨管入新年百事諧從此對花并
對景盡拘風月入詩懷

元程鉅夫和王寅夫郎中元

日立春馬蹄塵裏度芳辰帶得陽和到七閩山翠倚天
迎好客風光滿地屬吟身高情古柳仍青眼時態天桃
自絳脣從此不憂江海遠春官袖有十分春

楊維禎

嬉春體今朝立春好天氣況是太平朝野時走向南鄰
覓酒伴還從西墅買花枝陶令久辭彭澤縣山公祇愛
習家池宜春帖子題贈爾日日春遊日日宜

西子湖

頭春色濃望湖樓下水連空柳條千樹僧眼碧桃花一
株人面紅天氣渾如曲江節野人正是杜陵翁得錢沽
酒勿復較如此好懷誰與同

五喜排律增唐冷朝陽立春玉律傳佳節青陽應北辰
土牛呈歲稔綵燕表年春臘盡星迴次寒餘月建寅風
光何處好雲物望中新流水初銷凍潛魚欲振鱗梅花
將柳色偏思越鄉人明吳兆元旦書事閩中風景麗
元旦百花開有岸皆縈草無波不染苔樹光搖粉蝶雲
彩照金疊濃黛新年點春衣隔歲裁夜爐藏宿火曉燭
翦殘灰袖裏分餘蕙釵邊習落梅松枝當戶插淑氣拂
窓來正好隨懽笑那知客思催

五言絕句

御製春盤小摘園中露新香糝作羹歲和欣有兆甘菜已春

生

增唐杜甫瀼西果園正月喧鶯未茲辰放鷓初雪籬梅
可折風樹柳微舒李中早春一種和風至千花未散
妍草心竝柳眼長是被恩先儲嗣宗早春野樹花初
發空山獨見時踟躕歷陽道鄉思滿南枝宋朱子立
春前一日雪花寒送臘梅萼暖生春歲晚江村路雲迷
景更新

七言絕句**增**唐元稹第三歲日詠春風憑楊員外寄長
安柳三日春風已有情拂人頭面稍憐輕殷勤爲報長
安柳莫惜枝條動軟聲楊巨源城東早春詩家清景
在新春綠柳纔黃半未勻若待上林花似錦出門俱是
看花人韓滉晦日呈諸判官晦日新晴春自嬌萬家

攀折渡長橋年年老向江城守不覺東風換柳條來

鵬早春新曆才將半紙開小庭猶聚爆竿灰偏憎楊柳

難鈐轄又惹東風意緒來宋黃庶探春雪裏猶能醉

落梅好營杯具待春來東風便試新刀尺萬葉千花

手栽方岳立春綵燕雙簪翡翠翹巧裁銀勝試春韶

東風已到闌干北看見嬌黃上柳條真山民早春小

桃枝上認年華隨分紅開一兩花將謂春風只城市也

吹春色到山家元劉詵元日曉街泥淺馬蹄過元日

雖陰地已和處處桃花如二月東風應比去年多劉

因探春道邊殘雪護頽牆牆外柔絲露淺黃春色雖微

已堪惜輕寒休近柳梢傍趙雍早春高捲珠簾日漸

長梅花庭院雪飄香閒倚闌干看新柳不知誰爲染鵝
黃 明李東陽正月十八日甘棠院上元纔過又尋春
紅白山花粲粲新似喜使君初病起隔欄相向笑迎人
原陳繼儒早春春風無力柳條斜新草微分一抹沙欲
向主人借鋤插掃開殘雪種梅花

詩散句原唐杜甫元日到人日未有不陰時冰雪鶯難

至春寒花較遲 增唐張謂北斗回新歲東園值早春

竹風能醒酒花月解留人 趙璜正月今朝半陽臺信

未迴水芹寒不食山杏雨應開 宋之問節晦莫全落

春遲柳暗催 杜甫春城迴北斗郢樹發南枝 金李

俊民梅從今夜落柑憶舊時傳 原唐杜甫樽前柏葉

休隨酒勝裏金花巧耐寒
方干正氣纔隨灰律變殘

寒更被野梅欺
羅隱一二三四五六七萬物生芽是

今日
宋蘇軾七種共挑人日菜千枝先翦上元燈

劉克莊旋遣厨人挑薺菜虛勞座客頌椒花
未將柏

葉簪新歲且與梅花敘隔年
陸游菊芽冒土如爭出

柳色搖村已漸勻
增蘇軾挑菜年年俗
青蒿黃韭

試春盤

詞

御製立春調寄太平時
淑景維新爆竹聲手調羹詞臣載筆

賦瓊英學西京
鳳閣龍樓晝漸長物資生勸官勉力盡

昇平竹馬迎

增宋蘇軾減字木蘭花春牛春杖無限春光來海上便
與春工染得桃花似肉紅春幡春勝一陣春風吹酒
醒不似天涯捲起楊花似雪花**原**歐陽修蝶戀花簾

幙東風寒料峭雪裏香梅先報春來早紅蠟枝頭雙燕
小金刀翦綵呈纖巧旋暖金爐熏蕙藻酒入橫波困

不禁煩惱繡被五更春睡好羅帷不覺紗牕曉**增**辛

棄疾蝶戀花誰向椒盤簪綵勝整整韶華爭上春風鬢
往日不堪重記省爲花常把新春恨春未來時先借

問晚恨開遲早又飄零近今歲花期消息定只愁風雨
無憑準**原**孫巨源傳言玉女一夜東風不見柳梢殘

雪御樓烟暖對鰲山綵結簫鼓向晚鳳輦初回宮闕千

門燈火九遠風月。繡閣人人乍嬉遊困又歇艷妝初
試把珠簾半揭嬌羞向人手撚玉梅低說相逢長是上
元時節。丘密洞仙歌江城梅柳慣得春先處催趁風
光上歌舞見九衢車馬流水如龍喧笑語羅綺香塵載
路歡娛多暇日樽俎風流重見承平舊官府有多少
佳麗事墮珥遺簪芳徑裏瑟瑟珠璣翠羽好借取韶華
醉連宵更莫待收燈酒闌人去辛棄疾漢宮春春已
歸來看美人頭上裊裊春幡無端風雨未肯收盡餘寒
年時燕子料今宵夢到西園渾未辨黃柑薦酒更傳青
韭堆盤却笑東風從此便薰梅染柳更沒些閑閑時
又來鏡裏轉變朱顏清愁不斷問何人會解連環生怕

見花開花落朝來塞雁先還

別錄原

占候占書云三日得甲爲上歲四日中歲五日

下歲月內有甲寅米賤 得辛一日旱二日小收三四

日主水麥半收五六日小旱七分收八日歲稔一云春

旱不收一日麥收十分二日禾蠶收三日四日田蠶全

收五日六日麻粟麥蠶半收七日八日旱禾麻麥粟少

收絲貴 通書云歲首甲子蟲災桑穀貴丙子旱戊子

收壬子綿貴 周益公日記云歲首甲寅穀畜貴丙寅

油鹽貴戊寅壬寅穀先貴後賤庚寅穀畜貴 月內有

三卯宜豆無則早種禾一云一日得卯十分收二日低

田半收三四日大水五日六日半收七日八日春澇全

收乙卯荆楚米貴丁卯周秦米貴己卯燕趙米貴辛卯
韓魏米貴癸卯宋魯豆貴 得辰一日雨多二日風多
先旱半熟低田全收七月雨多麻豆全收三日雨晴勻
四日收七分五日歲稔六日大稔七日水損田蕎麥收
八日先旱後澇九日大麥收仲夏水災十日旱禾半收
十一日五穀不收冬大雪十二日冬大雪五穀收 歲
首得甲申五穀收丙申穀損蟲食菜戊申六畜災壬申
澇 得酉一日二日大豐三日四日民安五日至十日
中歲民不安十一十二日歲大熟 月內有三子葉少
蠶多無三子則葉多蠶少有三卯則旱豆收無則少收
有三亥主大水一云正月得三亥湖田變成海在正月

節氣內方準 占書云一日雞天晴人安國泰二日犬
晴主大熟三日猪晴主君安四日羊晴主春暖臣順五
日馬晴明四望無怨氣六日牛晴明日月光明大熟七
日人晴明民安君臣和八日穀夜晴五穀熟所值之日
晴暖則安泰蕃息 呂覽云元旦值甲穀賤乙穀貴丙
四月旱丁絲綿貴戊米麥貴巳米貴蠶傷多風雨庚田
熟辛米平麥麻貴壬絹布豆貴米麥平癸主禾傷多雨
一曰元日值戊主春旱四十五日 上元初日占百果
中日占晚稻末日占早稻 占穀旦至食爲麥食至日
跌爲稷跌至舖爲黍舖至下舖爲菽下舖至日入爲麻
欲終日有雨有雲有風有日日當其時者深而多實無

雲有風日當其時淺而多實有雲風無日當其時深而少實有日無雲風當其時者稼有敗如食頃小敗熟五斗米頃大敗風復起有雲其稼復起各以其時用雲色占種其所宜其日雨雪苦寒歲惡 占土牛頭黃主熟又專主菜麥大熟青春多瘟赤春旱黑春水白春多風身主上鄉蹄主下鄉田家以此占頗驗 元旦至十二日每日取水一瓶稱之一日主正月二日主二月其日水重則其月雨多輕則少 初一五鼓東高長草把燒之名照庭火伺燒將過看向何方倒所向之方其年必熟乃以大椽重舉拋丟聽其聲則衆和曰一跌田禾盛茂二跌五穀滿倉三跌六畜成羣四跌人口和平如此

隨口說不拘幾跌 元日牛俱卧則苗難立半卧半起
歲中平俱立則五穀熟 臘仙神隱立春天陰無風民

安蠶麥十倍東風吉人民安果穀盛 種植大麥杏豌豆

豆芋 移栽棣棠梔子木香紫薇白薇玫瑰銀杏櫻桃

錦帶金雀木蘭榆柏柳松槐 貼接蠟梅黃薔薇梅

插壓木樨杜鵑 培壅石榴梨海棠 澆灌桃瑞香杏

李 整頓燒荒田耕禾地燒苜蓿根理蔬畦壟瓜畦整

農具修花圃糞田畝 修樹諸果樹修去低小亂枝勿

分木力則結子肥大 元旦五鼓以斧斫諸果樹則結

子繁而不落辰日亦可 李樹石榴以石安丫中堆根

下則結子繁 元旦雞鳴時以火照諸樹無蟲此時蟲

尚未出凡聚葉腐枝皆蟲所穴宜去之 收採絡石菊

根 田忌 天火子地火戌糞忌未九焦辰荒蕪已

二月

鶯蟄春分春社中
和節花朝附見

增 禮記月令 仲春之月日在奎昏弧中旦建星中 注 日

月會於降婁而斗建卯之辰也 始雨水桃始華 是

月也耕者少舍乃修闔扇寢廟畢備母作大事以妨農

之事 梁元帝纂要是月曰仲春亦曰仲陽 花月令

是月也桃夭棣棠奮薔薇登架海棠嬌梨花溶木蘭競

秀 瓶史月表 二月花盟主西府海棠玉蘭緋桃花客

卿繡練杏花使令寶相花種田紅木桃李花月季花

翦春羅 花曆 玉蘭解紫荆繁

彙考 **增** **詩豳風** 四之日舉趾同我婦子饁彼南畝田峻

至喜 四之日其蚤獻羔祭韭 **夏小正** 二月往耒黍

禪傳 禪禪也 榮莖采蘩 **傳** 榮莖菜也采蘩蘩由胡由

胡者繁母也皆豆實也 榮芸時有見稊始收 **傳** 有見

稊而後始收是小正序也 **晉書樂志** 二月之管名爲

夾鐘者夾佐也謂時物尚未盡出陰德佐陽而出物也

淮南子 二月官倉其樹杏 **注** 二月興農播穀故官倉

也 **白虎通** 援神契曰仲春獲禾報社祭稷以三牲何

重功故也 **原** **說文** 卯冒也二月萬物冒地而出象開

門之形故二月爲天門 **增** **羯鼓錄** 玄宗嘗遇二月初

詰旦巾櫛方畢時當宿雨初晴景色明麗小殿內庭柳

黃庭芳譜 天時譜 二二月

杏將吐靚而歎曰對此景物豈得不與他判斷之乎左
右相目將命備酒獨高力士遣取羯鼓上旋命之臨軒
縱擊一曲曲名春光好神思自及顧柳杏皆已發拆
上指而笑謂嬪御曰此一事不與我作天公可乎嬪御
侍官皆呼萬歲

〔夢溪筆談〕二月物生根魁故曰天魁

〔晁氏客話〕望杏而耕以杏花時爲耕候也

〔成都古

今記〕二月有花市

〔暇日記〕二月白蘋水

〔風土記〕浙

風俗言春序正中百花競放乃遊賞之時宋制守土官
於花朝日出郊勸農

〔賞心樂事〕

二月現樂堂瑞香玉

照堂西湘梅南湖挑菜玉照堂紅梅餐霞軒櫻桃花杏
花莊杏花綺互亭千葉茶花

〔驚蟄〕

〔增〕易解卦〕天地解

而雷雨作雷雨作而百果草木皆甲拆前漢書五行

志雷出地則長養華實發揚隱伏宣盛陽之德論衡

雷二月出地百八十日雷出則萬物出春分增淮南

子天地之氣莫大於和和者陰陽調日夜分而生物春

分而生秋分而成生之與成必得和之精白虎通明

庶風春分至王者正封疆修田疇農家諺二月昏參

星夕杏花盛桑葉白荆楚歲時記春分日民竝種戒

火草於屋上有鳥如烏先雞而鳴架架格格民候此鳥

則入田以爲候風俗記鼓者春分之音以助萬物發

生王褒僮約二月春分被隄杜疆落桑披櫻種瓜作

瓠別茄披蔥原集韻鶡鳩鳥名春分鳴則衆芳生秋

分鳴則衆芳歇

社原禮記月令擇元日命民社注社

后土也使民祀焉神其農業也

增禮記祭法共工氏

之霸九州也其子曰后土能平九州故祀以爲社

周

禮疏春社以祈膏雨望五穀豐熟

原北史李士謙傳

士謙宗族豪盛二社會宴飲醉喧嘩至士謙所盛饌盈

前先設黍曰孔子稱黍爲穀之長荀卿亦云食先黍稷

寧可違乎少長肅然退相謂曰旣見君子乃覺吾徒不

德

增懼仙神隱社日祭五穀之神

提要錄社翁祈

雨不食舊水故社日必有雨謂之社翁雨陸龜蒙詩幾

點社翁雨一番花信風

中和節

增舊唐書德宗本紀

詔曰四序嘉辰歷代增置漢崇上巳晉紀重陽朕以春

方發生候及仲月勾萌畢達天地和同俾其昭蘇宜助
暢茂自今宜以二月一日爲中和節內外官司休假一
日 貞元六年二月百寮會宴曲江亭上賦中和節羣
臣賜宴七韻是日進兆人本業三卷司農獻黍粟各一
斗

新唐書李泌傳帝以前世上巳九日皆大宴集而

寒食多與上巳同時欲以三月名節自我爲古若何而
可泌請廢正月晦以二月朔爲中和節因賜大臣戚里
尺謂之裁度民間以青囊盛百穀瓜果種相問遺號爲
獻生子里閭釀宜春酒以祭勾芒神祈豐年百官進農
書以示務本帝悅乃著令與上巳九日爲三令節中外
皆賜緡錢燕會

花朝**增**提要錄二月十五日爲花朝

翰墨記洛陽風俗以二月二日爲花朝節士庶遊玩

又爲挑菜節秦中歲時記二月二日曲江采菜士民

遊觀極盛誠齋詩話東京二月十二日日花朝爲撲

蝶會乾淳歲時記二月二日宮中排辦挑菜御宴先

是預備朱綠花斛下以羅帛作小卷書品目於上繫以

紅絲上植生菜薺花諸品俟宴酌樂作自中殿以次各

以金篋挑之后妃皇子貴主婕妤及都知等皆有賞無

罰以次每斛十號五紅字爲賞五黑字爲罰上賞則成

號真珠玉盃金器北珠篋環珠翠領抹次亦鈿銀酒器

冠鈿翠花段帛龍涎御扇筆墨官窰定器之類罰則舞

唱吟詩念佛飲冷水吃生薑之類用此以資戲笑王宮

貴邸亦多倣之。熙朝樂事二月二日士女皆帶蓬葉
諺云蓬開先百草戴了春不老。二月十五爲花朝節
蓋花朝月夕世俗恒言二八兩月爲春秋之中故以二
月爲花朝八月爲月夕也。原成都志二月十五爲花
朝爲撲蝶會蜀人又以是日鬻蠶於市因作樂縱觀謂
之蠶市。壺中贅錄閩中以二月二日爲踏青節蜀中
以爲踏草節。宣府志宣府花朝節村民以五穀瓜果
種相遺謂之獻生城中婦女剪綵爲花插之鬢髻以爲
應節。

集藻文賦散句增漢張衡歸田賦仲春令月時和氣清

原熙鬱茂百草滋榮魏曹植節遊賦仲春之月百卉

叢生萋萋藹藹翠葉朱莖竹林青蔥珍果含榮感氣運
之和順樂時澤之有成 **原** 梁昭明太子錦帶書節應
佳辰時登令月和風拂迴淑氣浮空走野馬於桃源飛
少女于李徑花明麗日光浮竇氏之機鳥弄芳園韻響
王喬之管 **增** 唐侯喜中和節賦 我后令節中和孔嘉
凍已全解桃仍欲華慶賞之多宴樂既均于九有播植
之始教化爰貞于四遐

四言古詩 **原** 隋牛弘春祈稷歌 粒食興教播厥有先尊
神致潔報本惟虔瞻榆束耒望杏開田用憑戩穀式詠

豐年

五言古詩 **增** 唐德宗中和節日宴百寮賜詩 韶華啓仲

序初吉諧良辰肇茲中和節式慶天地春歡酣朝野同
生德區宇均雲開灑膏露草疏芳河津歲華方載陽東
作方肆勤慚非薰風唱曷用慰吾人 東風變梅柳萬
彙生春光中和紀月令方與天地長耽樂豈予尚懿茲
時景良庶遂亭育恩同致寰海康君臣永終始交泰符
陰陽曲沼水新碧華林桃稍芳勝賞信多歡戒之在無
荒

五言律詩

增

唐王勃仲春郊外東園垂柳徑西堰落花

津物色連三月風光絕四鄰鳥飛村覺曙魚戲水知春
初晴山院裏何處染鷞塵 白居易春村二月村園暖
桑間戴勝飛農夫春舊穀蠶妾擣新衣牛馬因風遠雞

豚過社稀黃昏林下路鼓笛賽神歸
宋徐鉉春分日

仲春初四日春色正中分綠野裴回月晴天斷續雲燕

飛猶箇箇花落已紛紛思婦高樓晚歌聲不可聞
邵

雍二月吟林下故無知唯知二月期酒嘗新熟後花賞

半開時只有醺酣趣殊無爛熳悲誰能將此景長貯在

心脾
張栻仲春過陽江亭子亭古危臨岸林幽巧近

城煙容隨雨住花片著溪清春事已如許客懷誰與傾

庭前幾株樹滿意欲敷榮
戴復古社日今朝當社日

明日是花朝佳節惟宜飲東池適見招綠深楊柳重紅

透海棠嬌自笑鬢邊雪多年不冝消
原柳州月泉東

風生意闌農圃正宜勤稻種開包曬菊苗依譜分疇西

曉耕雨舍北暮鋤雲莫待荒三徑歸歟陶令君 明張

祥鳶天氣近寒食村居遠市朝翠低新柳弱紅潤穉花
嬌聽鳥頻移榻看雲偶過橋隔村春社至會赴野人招
七言律詩 增唐李商隱二月二日二月二日江上行東
風日暖聞吹笙花鬚柳眼各無賴紫蝶黃蜂俱有情萬
里憶歸元亮井三年從事亞夫營新春莫悟遊人意更
作風簷夜雨聲 原宋李公麟于尋古櫟笑聲中此日

春風屬社公開眼已憐花壓帽放懷聊喜酒治龔攜刀
割肉餘風在卜瓦傳神俚俗同聞說已栽桃李徑隔溪
遙認淺深紅 增元洪希文春半採花芳菲著雨便成
苔問訊東君幾日回閨月不曾花下去今朝偶到樹邊

來幾何間濶。罵偏老如此。生疎蝶也。猜流水。水時光容易。
過舉頭枝上已青梅。方太古社日出遊。村村社鼓。隔
溪聞賽祀。歸來客半醺。水緩山舒。逢日暖。花明柳暗。貌
春分平田白。洳流新雨絕。壁青楓挂斷雲。策杖提壺。隨
所適。野夫何不可同羣。明曹太章。二月郊南柳色春。
淡雲晴靄動芳辰。霏霏花氣偏隨酒。嫋嫋鶯歌解和人。
野舫醉乘明月渡。芳洲情與白鷗馴。武陵溪水深幾許。
笑逐桃花欲問津。

七言絕句原唐韓愈賽神白布長衫紫領巾差科未勸
是閑人麥苗含穗桑生甚共向田頭樂社神增白居易

易二月二日二月二日新雨晴草芽菜甲一時生輕衫

細馬春年少十字津頭一字行

原張籍吳楚歌詞庭

前春鳥啄林聲紅夾羅襦縫未成今朝社日停針線起
向朱櫻樹下行 **張演社日村居** 鶯湖山下稻梁肥狔

穉雞棲對掩扉桑柘影斜春社散家家扶得醉人歸

宋王安石南浦南浦東岡二月時物華撩我有新詩含

風鳴綠粼粼起弄日鷺黃裊裊垂 **黃庭堅觀化竹筍**

纔生黃犢角蕨芽初長小兒拳試尋野菜炊香飯便是

江南二月天 **范成大春日田園雜興社下燒錢鼓似**

雷日斜扶得醉翁迴青枝滿地花狼籍知是兒孫鬪草

來 **增**范成大社日獨坐海棠雨後沁臙脂楊柳風前

然綠絲香篆結雲深院靜去年今日燕來時 **方岳社**

目燕子今年搗社來翠瓶猶有去年梅丁寧莫管杏花
俗付與春風一道開 金完顏璫春半喜晴陰寒二月

雪含雲兩日開晴淑景新借問海棠紅幾許杏花楊柳
不會春 原明陸樹聲熙熙麗日開青野漠漠平疇散

碧波山鳥一聲催布穀綠楊陰裏聽農歌 增王衡花

朝晴煙膏露若爲容躑躅香苞望曉紅莫怨五更風色
惡開花原是落花風 原曹勳羅綺生香散隱霞春光

不讓五侯家東風二月蘇隄路樹樹桃花間柳花

詩散句 增宋謝靈運山桃發紅萼野蕨漸紫苞 唐德

宗東風變梅柳萬彙生春光 周庾信新年鳥聲千種

轉二月楊花滿路飛 原唐唐彦謙二月雲煙迷柳色

九衢風土帶花香 寒郊二月初離別獨倚寒林嗅野

梅 **增**鄭谷和暖又逢挑菜日寂寥未是探花人 宋

邵雍年年二月凭高處不見人家只見花 陸游數點

霏微社公雨兩叢濃淡女郎花 元趙孟頫二月江南

鷺亂飛百花滿樹柳依依 葉顛燕子不來春又半一

簾花雨海棠時 明吳稼證三春花事終難負二月風

光半未過 唐杜甫社雨報豐年 釋皎然二月湖南

春草遍 宋陳與義二月山城未見花

別錄原占候十二日晴則百果實 十五日為勸農日

晴主年豐又為花朝晴則百果實 春分日風從震來

穀熟麥賤人安年豐青雲歲豐前後一日內有雷主歲

稔原種植穀黍稷葛秫韭椒蔥夏蘿葡萄瓠子王瓜
絲瓜菠菜苦蕒莧山藥萵苣稍瓜苘蒿生菜茄冬瓜紫
蘇四月芥西瓜香芋銀杏十樣錦落花生芝蔴藕枸杞
翦春羅黃精決明松萱草山丹蜀葵罌粟茶藤柏桑椹
紅花麗春黃葵金錢翦秋羅金鳳絡蔴老少年移栽
萆蔴映山紅茄萵苣各色藤菜甘露雪梅堆粟百合苦
蕒薤石榴十姊妹慈菰木瓜茱萸甘菊松栢桐葡萄薄
荷黃精牛蒡槐紫荊木槿芙蓉萱花凌霄杜鵑桑海棠
山茶玉簪迎春玫瑰菊石竹望江南苧蔴芭蕉貼接
桃李梨花紅梅杏柑海棠丁香柿栗桑插壓石榴芙
蓉梔子梨葡萄瑞香木槿薔薇壅培木樨灌溉櫻

桃芍藥牡丹瑞香橙橘 收採護蒿蕨芽板蕎蕎筆管

菜曰芡薺菜百合馬蘭頭蠶豆苗甘遂薯蕷芋不留行
黃精榆皮人參枸杞蒲公英黃蘗雲母薑菜白石英石
葦葉白芷白薇甘草紫石英狼毒根麝香猪苓地黃金
銀花麥門冬白朮當歸知母天門冬芋根牛膝香附茯
苓茯神黃連狗脊藁本茅香根升麻黃芩紫苑葶藶金
雀花前胡防己大黃巴戟天秦皮地榆天雄杜仲丁香
柴胡棟實蓬蒿桂皮虎杖 整頓去樹裏架葡萄 田
忌天火卯地火酉九焦丑糞忌戌荒蕪酉

佩文齋廣羣芳譜卷第二

佩文齋廣羣芳譜卷第三

天時譜

三月

寒食清明上巳穀雨附見

禮

記月令季春之月日在胃昏七星中且牽牛中註

日月會於大梁而斗建辰之辰也 桐始華 萍始生

乃爲麥祈實 是月也生氣方盛陽氣發泄勾者畢

出萌者盡達不可以內 命野虞母伐桑柘鳴鳩拂其

羽戴勝降于桑註蠶將生之候也 具曲植籩筐后妃

齋戒親東鄉躬桑禁婦女毋觀省婦使以勸蠶事 梁

元帝纂要三月曰季春亦曰暮春末春晚春 源花月

令是月也白桐榮茶蘼條達牡丹始繁麥吐華楝花應

續羣芳譜 天時譜 三月

候楊入大水爲萍

增

瓶史月表

三月花盟主牡丹滇

茶蘭花碧桃花客卿川鵲梨花木香紫荊花使令木筆

薔薇謝豹丁香七姊妹郁李長春

花曆

三月木筆書

空棣萼韡韡海棠睡繡毬落

真考

詩幽風蠶月條桑取彼斧斨以伐遠揚

周頌

嗟嗟保介維暮之春亦又何求如何新畬於皇來牟將

受厥明註暮春斗柄建辰夏正之三月也

夏小正三

月參則伏攝桑萎楊傳攝桑攝而記之急桑也萎楊楊

則花而後記之

采識傳識草也

祈麥實傳麥者五

穀之先見者故急祈而記之也

拂桐芭

傳拂也者桐

芭之時也或曰言桐芭始生貌拂拂然也

淮南子三

月官鄉其樹李昏張中則務種穀 汜勝之書三月榆

莢舒 四民月令三月杏花盛可蓄白沙輕土之田

風土記三月雨謂之迎梅 初學記三月雨日榆莢雨

夢溪筆談三月華葉從根而生故曰從魁 賞心樂

事三月花院月丹花院桃柳蒼寒堂西緋碧桃滿霜亭

北棣棠碧宇觀筍芳草亭觀草鬪春堂牡丹芍藥宜雨

堂千葉海棠艷香館林檎花院紫牡丹宜雨堂北黃薔

薇瀛巒勝處山花經寮鬪茶羣仙繪幅樓芍藥 聞見

近錄故事季春上池賜生花自上至從臣皆簪花而歸

演繁露三月花開時風名花信風初汎觀則似謂此

風來報花之消息耳按呂氏春秋曰春之得風風不信

則其花不成乃知花信風者風應花期其來有信也

寒食原四民月令齊人呼寒食爲冷節寒食以麩爲

蒸餅樣團棗附之名曰棗饊鄴中記并州俗冬至後

百五日爲介子推斷火冷食三日荆楚歲時記去冬

至一百五日卽有疾風甚雨謂之寒食增玉燭寶典

寒食爲大麥粥研杏仁爲酪引飴沃之酉陽雜俎寒

食賜近臣麥粥帖綵毬鏤鷄子原零陽總記蜀人遇

寒食用楊桐葉并細冬青葉染飯色青而有光食之資

陽氣道家謂之青精乾餽食今俗以來麥青草搗汁和

糯米作青粉團烏柏葉染烏飯作糕是此遺意金門

歲節洛陽人家寒食日裝萬花輿煮桃花粥增揮塵

後錄朱新仲少仕江寧在王彥昭幕中有代彥昭春日

留客致語云寒食止數日間才晴又雨牡丹蓋數種枝

欲拆又芳皆魯公帖與牡丹譜中全語也〔乾淳歲時

記〕清明前三日爲寒食節都城人家皆插柳滿簷雖小

坊幽曲亦青青可愛大家則加棗餠於柳上然多取之

湖堤有詩云莫把青青都折盡明朝更有出城人〔熙

朝樂事〕清明前兩日謂之寒食人家插柳滿簷青萋可

愛男女亦咸戴之諺云清明不戴柳紅顏成皓首〔清

明〕**原**素問清明次五日牡丹華〔四民月令〕清明節令

蠶妾理蠶室是月也杏花盛種百穀〔志林〕東坡在

黃州夢參寥誦所作新詩覺而記兩句云寒食清明都

過了石泉槐火一時新夢中日火固新矣泉何故新蒼
曰俗以清明日淘井春明退朝錄周禮四時變火唐
惟清明取榆柳火以賜近臣戚里宋朝惟賜大臣順陽
氣也增提要錄清明雨爲杏花雨歲時雜記清明

湖州進紫筍茶

東京夢華錄

清明日都人出郊往往

就芳樹之下或園囿之間羅列杯盤互相勸酬抵暮而
歸各攜名花異果山亭戲具謂之門外土儀轎子卽以
楊柳雜花裝簇頂上四垂遮映緩入都門斜楊御柳醉
歸院落明月梨花最爲盛景是月季春萬花爛熳牡

丹芍藥棣棠木香種種上市賣花者歌叫之聲清奇可
聽穀雨孝經緯清明後十五日斗指辰爲穀雨言雨

生百穀也

牡丹譜洛陽以穀雨爲牡丹開候而一百

五者長至一百五日開最先

溫公文集註洛陽人謂

穀雨爲牡丹厄

居家宜忌

穀雨日採茶炒藏能治痰

嗽及療百病熱疾

上巳

原

後漢書禮儀志三月上巳

日官民皆禊於東流水上

宋書禮志魏以後但用三

日不復用已

韓詩外傳鄭國之俗上巳於溱洧之上

招魂續魄秉蘭草祓除不祥

荆楚歲時記上巳日取

鼠麴汁蜜和粉謂之龍舌料以厭時氣

千金月令三

月三日上踏青履

增

洛陽圖經上巳日婦女以薺花

點油祝而灑之水上若成龍鳳花卉之狀則吉謂之油

花卜

酉陽雜俎

唐中宗三月三日賜侍臣細柳圈言

帶之免蠱毒

原

賞心樂事

三月三日男女皆戴薺花

諺云三春戴薺花桃李羞繁華

五色線荆楚歲時記

三月三日四民踏百草今人因有鬪百草之戲鄭谷詩云何如鬪百草賭取鳳凰釵

集

文賦散句

原

梁昭明太子錦帶書景逼徂春時臨

變節啼鶯出谷爭傳求友之音翔藥飛林競散佳人之
歷 晉張協洛禊賦夫何三春之令月嘉天氣之氤氲
和風穆以布暢百卉晷而敷芬 阮瞻上巳賦臨清川

而嘉讌聊假日以遊娛蔭朝雲而爲蓋托茂樹以爲廬
好修林之蒼鬱樂草莽之扶疎列肆筵而設席祈吉祥
于斯塗 **增** 簡文帝晚春賦待餘春于北閣藉高讌于

南波水篩空而照底風入樹而香枝嗟時序之迴斡歎
物候之推移望初篁之傍嶺愛新荷之發池石憑波而
倒梳林隱日而橫垂蕭子範家園三日賦懽茲嘉月
悅此時良庭散花藥傍插筠篁灑玄膠于沼沚浮絳棗
于泱泱觀翠淪之出沒戲青舸之低昂周庾信三日

華林園馬射賦于時玄鳥司曆蒼龍馭行羔獻冰開桐
華萍合皇帝幸于華林之園千乘雷動萬騎雲屯落花
與芝蓋同飛楊柳共春旗一色唐王勃三月上巳

祓禊序遲遲風景出沒媚於郊原片片仙雲遠近生於
林薄雜花爭發非止桃蹊羣鳥亂飛有踰鶯谷王孫春
草處處爭鮮仲阮芳園家家竝翠於是攜旨酒列芳筵

先祓禊於長洲却申交於促席
王維暮春逍遙谷讌
集序巖谷先曙羲和不能信其時
芳卉後春勾芒不能一其令
桃徑窈窕蘅臯超忽驂御延佇于叢薄
珮玉升降于蒼翠
蕭穎士蓬池禊飲序
禊逸禮也鄭風有之
蓋取諸勾萌發達陽景敷煦握芳蘭臨清川乘和蠲絜
用微介祉厥義存矣

四言古詩
晉張華三月三日後園會暮春元日陽氣
清明祁祁甘雨膏澤流盈習習祥風啓滯導生禽鳥翔
逸卉木滋榮纖條被綠翠華合英

五言古詩

御製時巡近郊憫農事有作
芳郊景物麗淑氣扇暮春靈雨

應良節光風薄佳辰省耕已屆候夙駕方來巡前驅列式
道羽衛羅鈞陳時有田間子荷耒披車塵譏訶勿頻數疾
苦當咨詢千耦幸終畝二鬴猶懸困糶衮爾勤動痾瘵子
隱親調賜出泉府拊循屬官臣行潦有挹器冽井無枯津
所惠良未徧嗷嗷愧斯人

宋謝惠連三月三日曲水集四時著平分三春稟融
爍遲遲和景婉天天鬪桃灼攜朋適郊野昧爽辭塵郭
斐雲興翠嶺芳飈起華薄解轡偃崇丘藉草遠迴壑際
清羅時籟託波汎輕爵宋鮑照三日氣暄動心思柳
青起春懷時艷憐花藥服淨俛登臺提觴野中飲愛心
烟未開露色染春草泉源潔水苔泥泥濡露條嫋嫋承

風裁鳧雛掇苦薺黃鳥銜櫻梅解衿欣景預臨流競覆
杯美人竟何在浮心空自摧

宸

梁簡文帝三日侍宴

林光殿曲水詩芳年多美色麗景復妍遙握蘭惟是旦
採艾亦今朝迴沙溜碧水曲岫散桃夭綺花非一種風
絲亂百條雲起相思觀日照飛虹橋繁華炫姝色燕趙
艷妍妖金鞍汗血馬寶髻珊瑚翹蘭馨起縠袖蓮錦束
瓊腰相看隱綠樹見人還自嬌玉桂鳴羅薦渠枕泛迴
潮洛濱非拾羽滿握詎貽椒

晚春

紫蘭葉初滿黃鶯

呀不稀石蹲還似獸蘿長更如衣水曲文魚聚林暝雅

鳥飛渚蒲變新節巖桐長舊園風花落未已山齋開夜

扉

沈約三日率爾成篇麗日屬元巳年芳具在斯開

花已匝樹流鶯復滿枝洛陽繁華子長安輕薄兒東出
千金堰西臨鴈鶩散清晨戲伊水薄暮宿蘭池寧憶春
蠶起日暮桑欲萎

增

庾肩吾三日侍蘭亭曲水宴策

星依夜動鑿駕總朝遊旌門臨苑樹相風出鳳樓春生
露泥泥天覆雲油油桃花舒玉澗柳葉暗金溝襖川分
曲沼帳殿掩芳洲踴躍頰魚出參差絳棗浮百戲俱臨
水千鍾共逐流

隋蕭愨春晚春庭聊縱望樓臺自相

隱窓梅落晚花池竹開新筍泉鳴知水急雲來覺山近
不愁花不飛到畏花飛盡

唐白居易寒食洛下宴遊

贈馮李二少尹豐年寒食節美景洛陽城三尹皆強健
七日盡晴明東郊蹋青草南園攀紫荆風折海榴艷露

陸木蘭英假開春未老宴合日屢傾珠翠混花影管絃
藏水聲佳會不易得良辰亦難并聽吟歌暫輟看舞杯
徐行米價賤如土酒味濃於餽此時不盡醉但恐負平
生殷勤二曹長各捧一銀觥

崔護郡齋三月下旬作

春事日已歇池塘曠幽尋殘紅披獨墜嫩綠問淺深
偃仰捲芳褥顧步愛新陰謀春未及竟初夏遽見侵

溫

庭筠寒食節日寄楚望芳蘭無意綠弱柳何窮綫心斷
入淮山夢長穿楚雨繁花如二八好月當三五愁碧竟
平臯韶紅換幽圃流鶯隱闌樹乳燕喧餘哺曠望戀層
臺離憂集環堵當年不自遣晚得終何補鄭谷有樵蘇
歸來要腰斧

宋歐陽修暮春幽憂無以銷春日靜愈

長薰風入花骨花枝午低昂往來採花蜂清蜜未滿房
春事已爛熳落英漸飄揚蛺蝶無所爲飛飛助其忙啼
鳥亦屢變新音巧調簧遊絲最無事百尺拖晴光天工
施造化萬物感春陽

陸游春晚書齋壁海棠已成雪

桃李不足言纖纖麥被野鬱鬱桑連村穉蠶細如蠶杜
宇號朝昏展墓秫餌美坐社黍酒渾早筍漸上市青韭
初出園老夫下箸喜盡屏鷄與豚幽居亦何樂且洗雨
耳喧呼兒燒柏子悠然坐東軒

蘇軾明文徵明妍英弄

芳意麗色含春姿物華浩無涯
駘蕩東風吹東風日已
熙草色日已滋青春萬里道遊子有所思浮雲漏白日
宿露朝已晞攀條惜婉麗忽得瑛瓊枝芳踪未有托暮

景已西馳菁華難復恃結蘄聊自怡

七言古詩

增

唐宋之間寒食陸渾別業洛陽城裏花如

雪陸渾山中今始發旦別河橋楊柳風夕卧伊川桃李
月伊川桃李正芳新寒食山中酒復春野老不知堯舜
力酣歌一曲太平人

王維寒食城東卽事

清谿一道

穿桃李演漾綠蒲涵白芷谿上人家凡幾家落花半落
東流水蹴踔屢過飛鳥上鞦韆競出垂楊裏少年分日
作遨遊不用清明兼上巳

李賀三月樂詞東方風來

滿眼春花城柳暗愁殺人複宮深殿竹風起新翠舞袵
淨如水光風轉蕙百餘里暖霧驅雲撲天地軍裝宮妓
掃蛾淺搖搖錦城夾城暖曲水飄香去不歸梨花落盡

成秋苑 宋邵雍三月吟滿城盡日行春去言念行春

還有數真宰何曾不發生遊人其奈無憑據梨花著雨
漫成啼柳絮因風爭肯住一片清明好急多奈何意好
難分付 明楊基清明看花詩吉祥一喜一堆錦綠髮仙

人對花飲腰鼓金盤五色藍醉歸猶帶花枝寢東風王
子幾清明三百年來寺已傾沙河塘上癡兒女猶頌錢
塘太守名看花我亦逢壬子况是清明非偶爾莫論南
浦與西湖楚水吳山正相似青蓮居士識前因金粟如
來見後身總不能知塵外劫也須曾是會中人 願何

景明長安三月百花殘滿城飛絮何漫漫千門萬戶東
風起陌上河邊春色闌美人高樓鎖深院白花濛濛落

如霰晴窓窈窕朝日遲亂入簾櫳趁雙燕遊絲相牽時
裊裊委地飄廊不須掃君不見江頭綠葉吹香綿隨波
化作浮萍草

五言律詩

御製春日內苑賜宴詩并序已未三月律應姑洗望日之吉
賜內閣大臣及侍衛宴於內苑時乃玩花於絳雪玉樹舍
風浮杯於西齋金池漾月飲酒樂甚因率題四韻以示羣
臣春深內苑裏珍席宴羣臣蝶向雙檐舞花飛復閣新和
羹期上佐調鼎協洪鈞簫鼓歡無極芳年醉此辰

增唐李益春晚賦得餘花落留春春竟去春去花如此
蝶舞遶應稀鳥驚飛詎已衰紅辭故萼繁綠扶凋蘂自

委不勝愁庭風那更起

原

柳中庸寒食春暮越江邊

春陰寒食天杏花香麥粥柳絮伴鞦韆酒是芳菲節人
當桃李年不知何處恨已解入箏弦 **張**又新三月五

日泛長沙東湖上已餘風景芳辰集遠峒湖光迷翡翠

草色醉蜻蜓鳥弄桐花日魚翻穀雨萍從今留勝會誰

看盡蘭亭

攷

項斯晚春花陰洞日光薄花開不及時

當春無半樹經燒足空枝踈與香風會細將泉影移此

中人到少開盡幾人知

攷

唐彥謙上巳寄韓八上巳

接寒食鶯花寥落晨微微潑火雨草草踏青人涼似三

秋景清無九陌塵與余同病者對此合傷神

增

宋余

靖暮春草帶全鋪翠花房半墜紅農家榆莢雨江國鯉

魚風堤柳綿爭撲山櫻火共烘長安少年客不信有衰

翁

蘇軾雨晴散步雨過浮萍合蛙聲滿四隣海棠真

一夢梅子欲嘗新拄杖閒挑菜鞦韆不見人殷勤木芍

藥獨自殿餘春

張九成晚春卽事幽事晚山色幽齋

春雨餘亂紅歛澗水浮綠漲郊墟北牖迸新筍西園生

野蔬槿籬遶茅屋已分老樵漁

范成大寒食郊行隴

麥欣欣綠山桃寂寂紅帆邊魚蘊浪木末酒旗風信步

隨芳草迷途問小童賞心添脚力呼渡過溪東

陸游

山家暮春遠屋清陰合綠堤綠草織起蠶初放食新麥

已磨鎌苦筍先調醬青梅小蘸鹽佳時幸無事酒盡更

須添

戴昺次韻春事海棠紅未了又近牡丹時送日

多忙事酬春久好詩暖風吹麥早晴晷轉花遲不盡清
遊興重爲上巳期 〔陳與義寒食草草隨時事蕭蕭傷
水門濃陰花照野寒食柳圍村客袂空佳節鶯聲忽故
園不知何處笛吹恨滿清尊 〔僧契嵩山亭晚春小庭
晚來靜林石自巉巉犬去吠人語花飛恣鳥銜晴烟熏
茂草照日藹高杉更喜團圓月清光下碧巖 〔明李禎
三月四日卽景忽忽春將暮俄過三月三草誰憐益母
花自媚宜男乍到尋巢燕初眠上箔蠶新茶與穉筍鄉
味憶江南

七言律詩

瞻

唐皇甫冉三月三日義興李明府後亭泛

舟江南烟景復如何聞道新亭更可過處處藝蘭春浦

續皇朝詩

天詩譜三

二月

七

綠萋萋藉草遠山多壺觴須就陶彭澤風俗猶傳晉永和更使輕橈徐轉去微風落日水增波

杜牧殘春獨

來南亭因寄張祐暖雲如粉草如茵獨步長堤不見人一嶺桃花紅錦斲半溪山水碧羅新高枝百舌猶欺鳥帶葉梨花獨送春仲蔚欲知何處在苦吟林下拂詩塵

溫庭筠寒食日作紅深綠暗逕相交抱暖含芳披紫

袍綵索平時牆婉婉輕毬落處晚寥梢窓中草色妬鷄卵盤上芹泥憎燕巢自有玉樓芳意在不能騎馬度煙

郊

原

李山甫寒食柳帶東風一向斜春陰淡淡蔽人

家有時三點兩點雨到處十枝五枝花萬井樓臺疑繡畫九原珠翠似烟霞年年今日誰相問獨卧長安泣歲

華 來鵬清明日與友人遊玉粒塘莊幾度春山共陸
郎清明時節好風光細穿綠荇船頭滑碎踏殘花屐齒
香風急嶺南飄迥野雨餘出水落芳塘不堪吟罷東回
首滿耳蛙聲正夕陽 寒食山館書情獨把一杯山館

中每經時節恨飄蓬侵堦草色連朝雨滿地梨花昨夜
風蜀魄啼來春寂寞楚魂吟後月朦朧分明記得還家
夢徐孺宅前湖水東 韓偓春盡日樹頭初日照西

簷樹底鶯花夜雨霑外院池亭聞動鎖後堂闌檻見垂
簾柳腰入戶風斜倚榆莢堆牆水半淹把酒送春惆悵
在年年三月病厭厭 原 韋莊長安清明早是傷春暮

雨天可憐芳草更芊芊內官初賜清明火上相閑分白

打錢紫陌亂嘶紅叱撥綠楊高映畫鞦韆遊人記得承
平事暗喜風光似昔年

增

宋王禹偁寒食今年寒食

在商山山裏風光亦可憐稚子就花拈蛺蝶人家依樹
繫鞦韆郊原曉綠初經雨巷陌春陰乍禁烟副使官閑
莫惆悵酒錢猶有撰碑錢

韓琦上巳瓊林苑賜筵春

光濃簇寶津樓樓下新波漲鴨頭嘉節難逢眞上巳賜
筵榮入小瀛洲仙園雨過花遺靨御陌風長絮作毵襖
飲不須辭巨白清明來日尚歸休

蔡襄上巳日杭州

東園地上多于枝上花東樓凝望惜年華潮頭正對伍
員廟燕子爭歸百姓家粉籜漸高山徑筍綠旗初展石
巖茶流芳自與人兼老尊酒相逢莫重嗟

原

歐陽修

清明賜新火魚鑰侵晨放九門天街一騎走紅塵桐花
應候催嘉節榆火推恩忝侍臣多病正愁飴粥冷清香
但愛蠟烟新自憐慣識金蓮燭翰院曾經七見春

曹

組寒食輦下海棠時節又清明塵歛烟收雨乍晴幾處
青帘沽酒市一竿紅日賣花聲綵毬時向梭門過繡轂
遙隨輦路行日暮人人醉歸去熙熙春物見昇平

范

成大上巳日萬歲池呈程詠之濃春酒暖絳烟霏漲水
天平雪浪遲綠岸翻鷗如北渚紅塵躍馬似西池麥苗
翦翦嘗新麩梅子雙雙帶折枝試比長安水邊景祇無
饑客爲題詩

陸游春晚雨足人家插稻秧蠶生隣女

採桑黃萬花掃迹春將暮百草吹香日正長閒覓啼鶯

穿北嶮戲隨飛蝶過東岡飄然且喜身强健不怪兒曹
笑老彊

楊萬里寒食雨作

雙燕衝簾報禁烟喚驚畫

夢聳詩肩晚寒正與花爲地曉雨能令水作天桃李海棠
聯病眼清明寒食又經年老來不辨雕新句報荅風
光且一篇

三月十日

纔看桃李錦城圍忽便園林綠

作堆遠草將人雙眼去飛花引蝶過牆來簿書節裏無
多著懷抱朝來得好開已是七分春去了何須鳥語苦
相催

吳龍翰春晚郊行

芒鞋竹杖出柴關簡點園林

脚不開翠幄初張花作局錦棚成列筍爲班烟波鷗鷺
春風外桑柘牛羊夕照閒野興不須邀客共芳樽濁酒
對黃山

許月卿三月

三月春如年少時了知造化最

兒嬉智行無事柳飛絮道發自然花滿枝錦繡園林添
富貴神仙院落鬪清奇老天長似春三月游戲人間不
皺眉

元王

暉清明日錦隄行樂浪說蘭亭禊事修年

年春好錦隄遊花翻舞袖驚歌板柳隔高城暗酒樓綠
樹恐應春事老金鞭重爲使君留竹西路晚歸時醉何
處珠簾半上鈎

李孝光次晚春韻燕幕沉沉春晝永

閒敲碁子小闌東拍天漲綠連朝雨滿地殘紅昨夜風
草際夢回詩有債柳邊寒薄絮無功韶光暗換千年事
莫遣閒愁著鬢中

明楊基江村寒食預折楊枝插繞

簷荳糜香軟麥餠甜春衣未染新絲織午篆猶分舊火
添小雨送春青見萼輕雷催筍碧抽尖不因人遠傷離

別那得春愁上短髯
沈周上巳日漫作和風晴日正
宜春碧柳紅桃得得新老謝
祓除何故事健追行樂有
閒身鄰翁採薺分家小遊女
揉花打路人不限長安水
邊好太平隨地總堯民

五言排律
唐白居易春末間出乘輕屐徐行踏軟沙
觀魚俯溢浦看竹入楊家
林迸穿籬筍藤飄落水花
雨埋釣舟小風颺酒旗斜
嫩剝青菱角濃煎白茗茶
淹留不知夕城樹欲棲鴉

五言絕句

御製途次逢寒食何處來
春風淡蕩開晴旭不見杏花紅纔
逢柳梢綠

增唐嚴維江南三月江南季春天蓴菜細如弦湖邊草

作逕湖上葉如船 **原**劉禹錫春晚思悠哉花葉自相

催漠漠空中去何時天際來 **增**崔道融春晚三月寒

食時日色濃于酒落盡牆頭花鶯聲隔原柳 **寒食夜**

滿地梨花白風吹碎月明大家寒食夜獨貯望鄉情

七言絕句

御製清明巳日纔從江岸行舟中還復度清明上林聞道花

遲發留與歸時聽早鶯 **清明登玉泉山**寒食登高芳草

青泉聲映柳覆春亭心中懷得天然處對對沙鷗樂野汀

原唐沈佺期上巳日被禊渭濱應制寶馬香車清渭濱

紅桃碧柳禊堂春皇情尚憶垂竿佐天祚先呈捧劍人

增錢起暮春歸故山草堂谷口殘春黃鳥啼辛夷花
盡杏花飛始憐幽竹山窓下不改清陰待我歸

原韓

翊寒食日卽事春城無處不飛花寒食東風御柳斜日
暮漢宮傳蠟燭青烟散入五侯家

增寶鞏襄陽寒食

寄宇文籍烟水初銷見萬家東風吹柳萬條斜大隄欲
上誰相伴馬踏春泥半是花

武元衡陌上暮春青青

南陌柳如絲柳色鶯聲晚日遲何處最傷游客思春風
三月落花時

韓愈晚春草樹知春不久歸百般紅紫

鬪芳菲楊花榆莢無才思惟解漫天作雪飛

杜牧春

晚題韋家亭子擁鼻侵襟花草香高臺春去恨茫茫
紅半落平池晚曲渚飄成錦一張

溫庭筠三月十八

日雪中作芍藥薔薇語早梅不知誰是艷陽才今朝領
得東風意不復饒君雪裏開方干寒食日百花香氣

傷行人花底垂鞭日易曛野父不知寒食節穿林轉壑
自燒雲成彥雄暮春日宴溪亭寒食尋芳遊不足溪
亭還醉綠楊烟誰家花落臨流樹數片殘紅到檻前

宋邵雍禁烟題錦屏山下二首寒食風烟錦屏下凭高
把酒興何如滿川桃李風妍媚不忍重爲風破除無

涯桃李待清明經歲方能開得成不念化工曾著力狂
風何故苦相陵秦觀三月晦日節物相催各自新癡
心兒女挽留春芳菲歇去何須恨夏木陰陰正可人

張耒晚春睡足高簷春日斜碾聲初破小龍茶樓邊綠

樹飛紅盡春色牆陰老薺花

范成大三月四日驟暖

日脚融晴晚氣暄睡餘初覺薄羅便如何柳絮沾泥處

暖似槐陰轉午天

春晚客去鈞窓詠小詩遊絲撩亂

柳花稀微風盡日吹芳草蝴蝶雙雙貼地飛

夕陽槐

影上簾鈎一枕清風夢昔遊夢見錢塘春盡處碧桃花

謝水西流

楊萬里三月廿七日送春只餘三日便清

和儘放春歸莫恨他落盡千花飛盡絮留春肯住欲如

何

王鎡深春

夾泥花上舊巢白邊翠箔桑空蠶又眠天

氣乍晴風候別坐看盆蕪出雙錢

燕子來時春又休

暖風吹綠上枝頭繡簾不隔荼蘼深月香影無人自入樓

僧道潛春晚

曉風池沼水瀾翻春盡淮南麥秀寒院

落無人日停午柳花如雪滿闌干 金高士談寒食燕

泥半落烏衣巷柳色全添綠綺窓且伴丁香過寒食弄

晴蝴蝶一雙雙 元宋褰春詞嬌春楊柳暗藏鴉掩映

文窓一樹花寒食清明都過了悄無車馬問儂家

詩散句 齊邢子才芳春時欲遠覽物惜將移新萍已

冒沼餘花尚滿枝 唐王維年光三月裏宮殿百花中

李嘉祐清明桑葉小度雨杏花飛 韋應物清明寒

食好春園百卉開 原賈島晴風吹柳絮新月起厨烟

白居易三月草萋萋黃鶯歇又啼 韋溫庭筠晚風

楊葉社寒食杏花村 司空圖人家寒食月花影午時

天 宋徐鉉東風不好事吹落滿庭花 韓琦春寒芳

意晚未見柳飛綿
〔楊萬里〕嘉子園園花寒食日日雨

〔原〕唐李白江邊石上誰知處綠戰紅酣別是春
〔杜〕

甫落花遊絲白日靜鳴鳩乳燕青春深
〔劉禹錫〕草色

淺深圍幄幕花枝上下逐鞦韆
〔胡曾〕金絡馬銜原上

草玉釵人折路傍花
〔崔魯〕杏酪漸香隣舍粥榆烟欲

變舊爐灰
〔韓偓〕惻惻輕寒翦翦風杏花飄雪小桃紅

〔張泌〕青草浪高三月渡綠楊花發一溪烟
弱柳未

勝寒食雨好花爭奈夕陽天
〔韋莊〕錦江風散霏霏雨

花市香飄漠漠塵
〔宋韓琦〕白楊花落眠蠶老紅杏枝

殘笑靨圓
興慶池頭三月三柳如拖綬草如衫
〔晏〕

殊夾道桃花新過雨馬蹄無處避殘紅
〔蘇舜欽〕春陰

垂野草青青時有幽花一樹明
〔歐陽修〕杯盤餽粥春

風冷池館榆錢夜雨新
九門寒食多遊騎三月春陰

正養花
〔王安石〕已著單衣猶禁火海棠花下怯黃昏

蕭蕭三月閉柴荆綠葉陰陰忽滿城
〔蘇軾〕北城寒

食烟火微落花蝴蝶作團飛
藍尾忽驚新火後遨頭

要及浣花前
〔謝逸〕點點花飛春事晚青青芳草暮愁

生
〔范成大〕桃杏滿村春似錦踏歌椎鼓過清明

石門柳綠清明市洞口桃花上巳山
〔元龔璠〕今年石

湖好清明每樹梨花香雪晴
〔周權〕杜宇青山三月暮

桃花流水一溪雲
〔馬臻〕潑火雨晴餽粥冷落花風暖

筍輿輕
〔原〕唐劉禹錫楚香寒食橘花時
〔陸羽〕人買

黃
天
詩
譜
三
三
月

山茶先穀雨

李商隱粥香飴白杏花天

增宋徽宗

茸母初生識禁烟

邵雍三月初三花正開

上巳觀

花花意濃

源

蘇軾

火冷飴稀杏粥稠

詞

增宋謝懋

憶少年

池塘綠遍王孫芳草依依斜日遊

絲捲晴晝繫東風無力

蜨趁幽香蜂釀蜜秋千外卧

紅堆碧心情費消遣更梨花寒食

劉克莊憶秦娥遊

人絕綠陰滿野芳菲歇芳菲歇養蠶天氣采茶時節

枝頭杜宇啼成血陌頭楊柳吹成雪吹成雪淡烟疎雨

江南三月

趙長卿畫堂春小亭烟柳水溶溶野花白

白紅紅惱人池上晚來風吹損春容

又是清明天氣

當年小院相逢凭欄幽思幾千重殘杏香中

原賀鑄

柳梢青子規啼血可憐又是春歸時節滿院春風海棠
鋪繡梨花飛雪 丁香露泣殘枝惜未比愁腸寸結自
是休文多情多感不干風月 李清照怨王孫帝里春
晚重門深院草綠堦前暮天鴈斷樓上遠信誰傳恨綿
綿 多情自是多沾惹難拚捨又是寒食也鞦韆巷陌
人靜皎月初斜浸梨花 明王世貞玉樓春是誰約勒
東君去枝上曉聲寒杜宇柔綠猶能抵死留妖紅不解
逡巡住 灞陵一陣飄香雨宛轉玉驄蹄下土記他含
蘂拆苞時總有千金無贖處 宋趙令時蝶戀花欲減
羅衣寒未去不捲珠簾人在深深處紅杏枝頭花幾許
啼痕止恨清明雨 盡日水沉香一縷宿酒醒遲惱破

春情緒飛燕又將歸信誤小屏風上西江路

增趙善

扛十拍子柳絮飛時綠暗荼蘼開後春酣花外青帘迷

酒思陌上晴光收翠嵐佳辰三月三解佩人逢游女

踏青草鬪宜男醉倚畫欄欄檻北夢繞清江江水南飛

鸞與共驂

原

明葉道卿鳳凰閣遍園林綠暗渾如昨

翠幄下無一片是花萼可恨狂風橫雨忒煞情薄盡底

把韶華送却楊花無奈是處穿簾透幕豈知人意正

蕭索春去也這般愁沒處安著怎奈何黃昏院落

王

世貞青玉案鴨頭波染濃于耐風起處紅香青皺乳燕

雙雙簾幙透梨花未雪綠楊猶絮蠶飽桑陰瘦無端

釀出清明候忽憶城南乍分手十二闌干寒更陡踏青

人遠鬪茶時近滋味如中酒
宋辛棄疾祝英臺近寶
釵分桃葉渡烟柳暗南浦陌上層樓十日九風雨斷腸
點點飛紅都無人管倩誰喚流鶯聲住
鬢邊覩試把

花卜歸期纔簪又重數羅帳燈昏唵咽夢中語是他春
帶愁來春歸何處又不解帶將愁去
滿江紅家住江

南又過了清明寒食花徑裏一番風雨一番狼籍紅粉
暗隨流水去園林漸覺清陰密算年年落盡刺桐花寒
無力
庭院靜空相憶無處說閒愁極怕流鶯乳燕得
知消息尺素如今何處也綠雲依舊無踪跡謾教人羞
去上層樓平蕪碧
增李琳六么令淡煙疎雨香逕渺

啼鳩新晴畫簾閑卷燕外寒尤力依約天涯芳草染得

春風碧人間陳迹斜陽今古幾縷遊絲趁飛蝶誰向
尊前起舞又覺春如客翠袖折取鶯紅笑與簪華髮回
首青山一點簷外寒雲疊梨花著雨柳花飛絮夢繞闌
干滿園雪施岳曲游春畫鼓西泠路占柳陰花影芳
意如織小楫衝波度麴塵扇底粉香簾隙岸轉斜陽隔
又過盡別船簫笛傷斷橋翠繞紅圍相對半篙晴色
頃刻千家暮碧向沽酒樓前猶繫金勒乘月歸來正梨
花夜縞海棠烟幕院宇明寒食醉乍醒一庭春寂任滿
身露濕東風欲眠未得

別錄

原

占候

三月有三卯宜豆無則麥不收

月內有

暴水謂之桃花水主多梅雨無則無

清明有水而渾

主高低田大熟雨水調 朔日值清明草木茂值穀雨

主年豐 上巳聽蛙聲上晝叫上鄉熟下晝叫下鄉熟

終日叫上下齊熟聲啞低田熟聲響低田澇 [種植穀

黍芝蔴薏苡黑豆御麥棉花白扁豆蠶豆刀豆紅豆葫

蘆茄豇豆落花生生菜菠菜菘菜蒿蒿葱山藥稔瓠子

菱筍稍瓜香芋蘿蔔韭王瓜南瓜冬瓜菜瓜蘘荷茴香

薑大豆銀杏葡萄薤土瓜芋薺芋香菜櫻桃枸杞椒紫

蘇白蘇天茄望江南梨菊牛旁鳳仙薄荷玫瑰十樣錦

藕粟百合雞冠山丹紅花紫草薇獨帚草麻子石竹罌

粟商陸葵決明麻 [移植]石榴地黃楊梅木瓜梧桐柑

橘夜合冬青寶相檜桑海棠橙菱木槿麗春玉簪杉槐

芙蓉薔薇秋海棠芭蕉楮梔子木香醒頭香紫萼

貼

收

接柑柚橙橘玉蘭棗香櫟柿接桃桐接栗杏接梅
採筆管菜藤花椿芽蘗蒿蒲公英槐芽菊芽金雀花薺
菜黃棟芽牛膝蕨芽葵菜藜菜看麥娘黃連芽葛花灰
莧薇菜斜蒿老鶴嘴蓬蒿芽水苔紫草車前葉牛舌科
厚朴紫花王瓜鈎藤天筍苗鴈兒腸狗脊土瓜荆芥碎
采薺天門冬芫花白附子澤蘭川芎芽紫參根防葵穀
精草艾紫葛根皮紫背浮萍夏枯草蕪荑實白朮青菉
莖葉澤漆莖葉羊躑躅白薇根玄參小水萍桑寄生黃
芩防風芽射干根

整頓

開溝渠犁秧田理花棚浸稻

出菖蒲鋤蒜拔蓬

製用

千金月令三月三日採艾挂

戶風乾以備醫藥 [四時纂要] 三月三日取桃花片至

七月七日和烏雞血塗面與身 [萬花谷] 三月三日宜

沐枸杞湯 [便民要纂] 三月採夏枯草煎汁熬膏治遠

年損傷 [田忌] 天火午地火申九焦戌荒蕪丑糞忌辰

佩文齋廣羣芳譜卷第三